

四庫全書

史部

欽定四庫全書

史部

山西通志卷九十四

詳校官監察御史臣查善長

檢討臣德生覆勘

總校官進士臣朱 鈞

校對官學正臣常 循

謄錄監生臣劉家瑛

欽定四庫全書

山西通志卷九十四

名宦

十二

大同府

明

馬隆陝西中部人正德間任大同府推官性沉毅執法如山然廉平不苛無滯獄後戍卒變將鼓噪入王府隆挺身往亂卒聞隆至皆寂然退就伍無敢譁者

孫璽字朝信平湖人正德戊辰進士性寬厚持重內剛  
外和不通權要歷陞山西參議仍落僉事嘗奉命大  
皇莊草場地土清其地之為奄戚所漁奪者悉歸之  
民大同經兩亂後卒伍驕悍少不當意輒負怙跳躑  
以為常璽巡大同盡心撫馭人賴安堵頃之吉囊入  
寇斬首多以贊畫功賜金後罷歸以詩自娛有雲山  
履歷稿

杜旻錦衣衛人初為御史有直聲正德間知大同府遭

時多故法令廢弛是確有擔當保境庇民不為權貴所撓士民賴之

楊文奎隆德人正德間知靈邱縣性剛方築關廂建學舍境內一新祀神祭器之屬無不周具平賊有功陞應州知州邑人勒石頌德

抗雄字世威世德衛總旗擢延綏遊擊將軍偕副將安國破敵岢嵐武宗幸宣府大同雄扈從即拜大同總兵官上嘗見雄羶惟救甚曰老抗窮乃爾寇至上將

親擊雄叩馬諫曰主人畜犬盜至不吠奚用犬為願  
聽臣等効力上笑而止嘉靖初汰傳奉官獨雄以方  
守邊命署都督僉事鎮守如故後佩平虜大將軍印  
閒住卒雄敢戰時西北名將馬永下稱雄

王鎧蔚州人世襲中右所正千戶正德中從遊擊將軍  
許寧征延綏至婆羅堡倉卒與賊遇鎧奮勇先登率  
所部大呼乘之殺傷過當力竭援兵不繼遂死事聞  
贈懷遠將軍子以原官晉一級

馬永字天錫遷安人驍果有謀習兵法正德中充總兵  
官鎮薊嘉靖初大同兵變命桂勇為總兵官往鎮而  
議將撫之永言逆賊干紀朝廷赦其脅從恩至渥顧  
猶抗命今不勒春和北寇南牧判卒勾連禍滋大宜  
亟調鄰鎮兵剋期攻城曉譬利害懸破格之賞令賊  
自相斬為功元凶不難殄也乃命永督諸軍與侍郎  
胡瓚往會亂平乃還鎮後請宥議禮諸臣奪官及大  
同軍再亂廷臣交薦召至已就撫復還起鎮遼東卒

許繼章邠人正德間知渾源州涖官清勤自奉甚約雖古廉吏不能過及卒囊無百錢土人嘆惜

李昆字承裕介子弘治初進士為兵部員外郎忤尚書劉宇貶知解州嘉靖初累官兵部左侍郎大同軍亂殺巡撫張文錦昆承制曲赦之還請收卹文錦不從歸卒

蔡天祐字成之睢州人弘治末進士累遷山西按察使嘉靖三年八月大同兵亂巡撫張文錦遇害詔曲赦



亂卒擢天祐左僉都御史代之天祐從數騎馳入城  
諭軍士獻首惡衆心稍定會尚書金獻民總兵官杭  
雄出師甘肅道大同亂卒疑見討復鼓噪天祐懼急  
請再赦兵部議除元惡特遣大臣總督宣大軍務乃  
命戶部侍郎胡瓚偕都督魯綱統京軍三千人以往  
瓚等未發而進士李枝齎餉銀至亂卒曰此承密詔  
盡殺大同人為軍獍也夜中火起圍枝館出牒示之  
乃解尋復殺知縣王文昌圍代王府脅王奏乞赦王

急攜二郡王走宣府巡按御史王官言亂卒方囂大帥兵壓境是趣之叛也請急止禁軍容臣密圖乃命瓚駐兵宣府頃之天祐奏總兵官桂勇已捕五十四人請止京軍勿遣上責以阻撓令必獲首惡郭鑑等既而瓚次陽和勇天祐令千戶苗登擒斬鑑等十一人函首送瓚請班師甫二日鑑父郭疤子復糾徐穉兒等夜殺勇家人又燬苗登家瓚言非盡殲不可上乃切讓天祐召勇還京以故總兵朱振代之勅瓚仍

駐宣府無何天祐捕戮徐龜兒等璣遂班師明年正月總兵官馮永等言疤子潛逃塞外將遣勘會璣還言逃卒無足患乃罷勘疤子復潛入城夜焚振第明旦天祐閉城大索獲其黨三十四人悉斬以殉盡宥脅從人心大定事聞賚銀幣晉副都御史巡撫如故尋就晉兵部左侍郎召還部歸卒天祐有才智兵變時左右皆賊耳目天祐廣招星卜藝士往來軍中因具得其情卒賴以成功在鎮七年有威德父老立安

輯祠

何棟字伯直號太華長安人正德辛巳進士博綜羣籍  
篤嗜數學商榷古今如指掌歷陞都察院左僉都御  
史巡撫大同是時彗星見於井之未度為大同分野  
棟考索象緯圖經疏言彗色蒼赤期年後當有圍城  
蹶將之災至鎮中嚴紀律拊循營伍寇入高山站選  
將勵兵俘四十九級邊境肅然未幾左遷四川參議  
後晉右都御史兵部左侍郎乞休

車純字秉文上虞人博綜經史冥心元悟以易學為時  
宗正德丁丑進士累擢山西布政使司參議分守大  
同大同故扼邊而險時戍卒稱亂寇薄近郊純轉餉  
調兵多方經畧文武大吏倚如長城因著備邊論若  
千篇歲稔民饑純發邊儲賑之而處補其闕蘇活無  
算撫按以最績上晉雲南按察司副使備兵曲靖後  
晉副都御史巡撫湖廣所攜惟圖書數篋而已著有  
百山集解組稿乞歸二十年而卒

毛伯溫字汝厲吉水人正德三年進士嘉靖中累官大理寺丞李福達獄起坐失入褫職起右僉都御史巡撫山西未赴十八年二月上幸承天詔總督宣大山西軍務大同鎮邊鎮川弘賜鎮河鎮魯五堡相距二百餘里極邊自巡撫張文錦以築堡致亂後無敢議修者伯溫曰變所繇生以任用匪人非建議謬也卒營之募軍三千防守給以閒田永除其賦邊防賴焉錄功加太子少保閏七月南征安南後為兵部尚書

削籍卒天啟初追謚襄懋

韓邦靖字汝度朝邑人與兄邦奇同登正德三年進士  
嘉靖初為山西左參議分守大同歲饑人相食奏請  
發帑不許復抗疏千餘言不報乞歸不待命輒行軍  
民遮道乞留抵家卒未幾邦奇亦以參議涖大同父  
老因邦靖故前迎皆泣下邦奇亦泣秦晉人盛傳之  
劉源清字汝登東平人正德甲戌進士偉幹負氣臨義  
敢為以僉都御史巡撫宣大調度士馬歲省四十萬

金北寇大舉入總帥被圍源清冒險遣發斬首虜數十餘級遂遁去滴水崖卒郭春等與民訟辭屈以數百人據城叛源清遣兵傅城呼曰擒春等數人而止守陴者執春等斬之進副都御史再以兵部左侍郎總制宣大尋罷歸卒隆慶初贈兵部尚書賜祭葬

許宗魯字東侯陝西咸寧人正德中進士嘉靖初以御史按宣大大同將卒驕悍宗魯罪其尤甚者如法將卒帖然先是大監劉祥乾沒邊餉以萬計而罪止罷



鎮宗魯請下獄祥大懼即如數抵還御史曹嘉抗疏  
論諸大臣有給事希指劾之嘉得罪宗魯力白其誣  
嘉乃獲免嘗疏糾武定侯郭勛太監蕭敬時勛與敬  
方幸疏出一時以為危言宣大故有大邊正德時以  
道遠棄不守宗魯行部至其地畫狀以聞議復為當  
事者所沮乃止補築近邊嗣後宣大失地利難守人  
始服其先見後以遼東巡撫致仕構草堂聚圖書其  
中所著有少華遼海歸田諸集

楊武字宗文岐山人以丙辰進士知淄川決疑獄甚多  
己巳擢大理寺左寺丞受勅勘視大同邊務若屯田  
不均軍役耗損諸弊政釐正裁革彈劾不少避邊人  
誦焉庚午超拜左僉都御史巡撫宣府地方未幾罷  
歸

毛鵬字汝南棗強人嘉靖間進士授江陰知縣拜御史  
巡按宣大酌時宜條邊務百六十餘疏陳宗室饒陽  
王克恭稔惡承奉劉寶助惡憑凌并奏訊於辟宗藩

肅然累陞寧夏巡撫濬水利設亭障築牆塹一萬八千五百餘丈敵內侵俘獲甚多不自有其功盡歸將卒人咸效死且恤商販而人樂輸禁侵牟而軍安業擢右副都御史巡撫山西提督鴈門等關為治一如陝西方依為長城以盡瘁邊事遘疾乞歸竟不起年僅四十有四鵬體貌魁梧丰神爽朗賦性剛介持身端嚴博典籍工詩文孝友姻睦之行素孚於里閭至其經濟醞藉尤為時所推重未竟其用而歿中外惜

之

詹榮字仁甫山海衛人嘉靖五年進士以戶部郎中督餉大同值兵變殺總兵官李瑾總督劉源清率師圍城久不下榮素有智畧善應變叛卒掠城中無犯榮者外圍益急榮密約都指揮紀振遊擊戴濂鎮撫王寧同盟察叛卒馬昇楊麟無逆志乃陽令寧持官民狀詣源清所為叛卒乞原而陰以榮謀告請宥昇麟死昇三千金俾募死士自効會源清已罷巡撫樊繼

祖許之昇麟遂結心腹擒戮首惡黃鎮等九人榮乃  
開城門延繼祖入復捕斬二十六人錄功擢光祿寺  
少卿後遷右僉都御史巡撫甘肅二十三年以大同  
巡撫趙錦與總兵官周尚文不相能詔榮與錦易任  
諳達數萬騎入掠榮與尚文破之黑山陽晉右副都  
御史寇復大舉犯中路參將張鳳等陣沒榮與尚文  
及總督翁萬達屢兵備陽和而遣騎遙擊多所殺傷  
寇乃引去代府奉國將軍克灼行剽榮奪其祿充灼

等結小王子入寇謀據大同榮告尚文捕得皆伏辜  
又築東路邊牆設墩堡請召軍佃作寇再入犯與尚  
文破之彌陀山斬一部長榮先以靖亂功晉兵部左  
侍郎又以繕邊破敵累被獎賚召還理部事閒住卒  
當榮撫大同與總督萬達總兵尚文皆有才略寇數  
入不能得志萬歷中贈工部尚書

許論字廷議靈寶人進少子也嘉靖五年進士好談兵  
幼從父歷邊境盡知阨塞險易因著九道圖論上之

上喜頌邊臣議行自是以知兵聞二十九年為右副都御史巡撫山西錄防秋功晉兵部右侍郎三十二年又以左侍郎出督宣天山西軍務奸人呂鶴初與丘富以左道惑眾富為佞答謀主鶴因潛伏應州城遣其黨闖出塞外引寇為偵卒所獲論遂遣兵捕鶴并誅其黨以功晉右都御史再以功晉兵部尚書蔭子錦衣世千戶時邊牆盡撤而守臺請改築於牆外每三百步建一臺詔立從之寇萬騎入山西督軍遮

破之朔州川先後俘斬五百三十有奇加太子太保復廢子三十五年兵部尚書揚博以父喪去召論代之三十七年諳達圍大同右衛城數重城中拆屋而爨上密問大學士嚴嵩嵩意欲棄之而難於發言請降諭問本兵論言右衛孤懸絕塞能復其軍馬歲辦五十萬金此彈丸可保也蓋設為難詞以動上上顧亟措餉發兵易置文武將吏而右衛圍亦尋解論遂削籍後復起卒謚恭襄



黃綰字宗賢黃巖人孔昭孫也承祖廕以議禮任詹事  
又拜禮部左侍郎大同軍變殺總兵官李瑾據城拒  
守總制侍郎劉源清提督郤永議屠之百道攻城中  
恟懼外勾寇為助塞上大震巡撫潘做請止兵源清  
力詆做大學士張璉及廷議並右源清綰獨言非策  
及源清罷侍郎張瓚往代未至而郎中詹榮等已定  
亂亂卒未盡獲軍民瘡痍甚代王請遣大臣綏輯之  
乃特以命綰且令察軍情勛功罪得便宜行事綰馳

至大同宗室軍民牒訴官軍暴掠者以百數無告叛  
軍者縮一無所問以安其心有為叛軍使寇歸者縮  
執戮之反側者復相煽縮大集軍民曉以禍福罹害  
者陳牒佯不問而密以牒授給賑官按里核實一日  
捕首惡數十人卒尚欽殺一家三人懼不免夜鳴金  
倡亂無應者遂就擒縮復圖形購首惡數人軍民不  
復虞誑誤乃令有司樹木柵設保甲四隅創社學教  
軍民子弟城中大安還朝列上文武將吏功罪極詆

源清永二人卒被逮縮以勞增俸一等後起禮部尚書兼翰林學士歸卒

李良字遂伯長清人嘉靖己丑進士孝友勤學由推官歷陞山西參議副使晉右僉都御史巡撫宣府贊理軍務知形勢明戰守外禦強寇內制橫軍邊圉晏然上奏疏數十皆切要又見屯戍單寡建併守之議年五十一卒於家

江東朝城進士累官兵部右侍郎嘉靖間總督宣大軍

務抵任邊兵大入犯雞鳴勢猖甚東選銳士出其不  
意擊退遂由故道出塞以原官召還部視事三十七  
年春大同右衛圍急數月餉道不通復以東總督軍  
務上諭曰右衛久困朕聞城守將變爾勵精急圖之  
東設策得通餉城中士氣百倍選集主客兵數萬圍  
乃撤東即日入衛城所運糧凡四千餘石軍民感泣  
呼聲震地進兵部尚書協理戎政尋復總督宣大軍  
務邊患少蘇上遣中使饋食爾書褒獎四十四年卒

於懷來贈少保謚恭襄

趙炳然字子晦劍州人嘉靖十四年進士為御史與給事中李文進覈宣大山西兵餉劾前後督撫樊繼祖史道監司楊銳指揮馮世彪等一百七十七人侵冒罪坐謫有差條上備邊十二事後以兵部尚書兼右都御史總督宣大山西軍務新平平遠保平三堡密迺宣府舊屬大同天成相去六十里孤懸塞外隔崇山寇騎時出沒炳然慮其不守奏添設參將別為一

營詔如所請尋以馬芳等劫敵功被賚已召還部代  
揚博為尚書加太子少保隆慶初乞休卒贈太子太  
保謚恭襄

侯鉞字義甫東阿人金丞相摯之後嘉靖辛丑進士魁  
岸有大度論事侃侃由工部郎中出為山西屯田僉  
事有詔築龍門邊五百里衆以寇所出入相顧莫敢  
往鉞獨以身任之一日寇大至左右請入城避答曰  
吾舍數萬丁夫獨先安往乃驅民入城身為之殿擢

山西副使整飭陽和兵備大將軍仇鸞行邊司道皆  
伏謁鉞獨長揖不伏鸞初不悅及與語縱橫指畫旁  
若無人鸞竒其才謂軍門曰此中嶽嶽侯君一人兵  
備三月拜右僉都御史巡撫大同致仕歸常與田夫  
漁父揮鋤分畝相娛樂過者不知其為故中丞也

王忬字民應太倉人少以文學名三吳嘉靖二十年進  
士以御史監河東鹽法歲餘復巡視諸省甲寅上手  
勅吏部命忬撫大同比至鎮上書具言歲祲乏軍興

狀請大司農金錢十餘萬賑之活者萬計會寇入與  
總督許合兵徽破之捕首虜百餘馬牛羊稱是捷聞  
進兵部右侍郎兼右僉都御史終右都御史兼兵部  
左侍郎嵩黨巧詆以罪卒後子世貞白寃復其職

楊總錦衣衛人嘉靖間知大同府方正自持輕徭薄賦  
餽遺一無所受有懸魚之風

王誥西平人嘉靖間知大同府寬大精明囑托不行貨  
財不染未幾以憂去隨陞湖廣參政民甚思之



桂林石埭人知廣靈縣蠲煩滌苛一意蘇息每秋多方儲積及春以貸貧不能耕者去之日百姓泣涕攀留不忍舍

許光宗乾州人嘉靖間以舉人知山陰縣築堤捍水修增城垣督課諸生撫恤百姓類多善政

廉汝為城固人嘉靖間以進士知應州守正不阿奉法惟勤革數十年夙弊州賦立清

郭從道徽州人嘉靖間以舉人知應州荒蕪多所開墾

逃移聞風來歸祀名宦

屠安民興安人嘉靖間以舉人任大同同知以寬和甦  
罷困循良著聲陞恩州知府

殷尚質天津衛人襲指揮僉事歷太原大同參將嘉靖  
三十二年督軍解巡撫侯鉞圍擢副總兵後戰歿廣  
寧

岳懋陝西人嘉靖三十三年為大同總兵官五月懋巡  
邊中敵誘指揮薛恭諫不聽追擊至青圪塔陷伏中

戰死秦已奪圍出太息曰主將死我何用生復陷陣  
死之贈懋左都督謚壯愍立祠廕子秦亦贈廕祔享  
懋祠

馬呈書廣平人嘉靖間以舉人任大同縣知縣饒才華  
善剖決民以訟至者立判之稱神君秩滿擢本府同  
知會議欵貢呈書多所擘畫督府倚重入為郎中尋  
復出知大同府鎮撫有方尤加意學校三雲戎馬間  
絃誦時聞擢運司致政歸

曹應爵嘉靖間任鎮西衛副千戶敵騎入寇應爵率部兵二百人堵戰青草峒口有潛伏者見之惶懼將越墻去應爵遽前持其足左右競射之誤中頰死

南逢吉字元真陝西渭南人嘉靖間以進士累官大同兵備副使時邊務廢弛將士無能知陣法者逢吉授以奇正方員諸紀律早夜練習為制敵具按舊志盡復演場之為豪右侵據者數巡三關外簡部伍嚴亭障旗幟壁壘煥然一新敵人遠徙又條上便宜五事

多觸忌諱執政者格弗上中以飛語罷官歸逢吉與  
兄大吉俱受業王陽明為高弟當時以二難目之

胡宗憲江南績溪人嘉靖間以進士官御史巡按大同  
饒機權裕謀畧於兵事尤諳練其按大同關塞險易  
將卒勤惰具能深悉其故條畫封守為國家當一面  
會倭奴內犯晉副都御史巡撫浙福江西等處屢奏  
膚功為陸鳳儀所誣卒於獄隆慶初詔復其官賜祭

葬

焦澤大同後衛人剛毅有謀先以遊擊從總兵周尚文  
戰彌陀戰鳳凰斬獲甚衆嘉靖間總兵大同邊疆寧  
謐後鎮昌平掌團營握兵最久家無餘貲勛勞茂著  
無有繼者

張達涼州人目不識書慷慨負奇節膂力絕人嘉靖中  
克延綏遊擊將軍吉囊俺荅大入山西達赴援數過  
寇殺傷相當被圍嵐縣力戰得出累擢署都督僉事  
克山西總兵官駐寧武寇大入太原躡州縣三十八

連繫獄兵部尚書毛伯溫言達善撫士卒被逮之日  
部曲攀號如失慈母請令立功須後效不從二十三  
年給事中戴夢桂請釋達命赴軍前立功却敵鐵裹  
門後以總兵官鎮大同俺答入巡按御史胡宗憲趣  
戰達素勇敢好離營繞關挺身陷陣寇圍數匝副總  
兵林椿援之胥戰歿贈左都督謚忠剛立祠賜祭葬  
二子世傑世授血戰潰圍廕世指揮僉事

周尚文字彥章西安後衛人多謀畧精騎射襲指揮同

知嘉靖中起山西副總兵寇繇偏頭關趨奇嵐轉戰三百里破之與其子君佐俱傷賚銀幣二十一年秋又以總兵官鎮大同請增餉及馬兵部議格之而尚文與巡撫趙錦不協乞休弗允御史王三聘請移他鎮廷議大同敵衝尚文假此避耳乃移錦甘肅吉囊數萬騎犯前衛有黑山涼城之捷晉右都督已寇繇宣府入出大同塞而北尚文邀之稍有俘獲後寇復大舉犯鵠鵠峪將南下尚文備陽和遣騎四出邀寇



寇遁賜勅獎勞之總督翁萬達議築邊牆自宣府西陽和至大同關山口延袤二百餘里以屬尚文乃益築陽和以西至山西了角山凡四百餘里敵臺千餘斥屯田四萬餘頃益軍三千有奇上嘉其功晉左都督加太子太保叛人充灼召小王子寇邊尚文偵得其使者加太保廢子錦衣世千戶時諸邊歲受寇患大同尤甚自尚文蒞鎮與總督萬達巡撫詹榮規畫戰守邊民息肩者數年尚文益招叛人孤敵勢歸者

相屬二十七年八月寇圍指揮顧相等於彌陀山出  
援之解其圍又勝於野口而還旋以大同兵援宣府  
勝於曹家莊錄功兼太子太傅賜賚有加其年卒尚  
文得士死力善用間故所向有功自二十年後諳達  
頻擾邊宿將王效馬永梁震皆前卒惟尚文存威名  
最盛及卒嚴嵩父子格卹典不予穆宗初贈太傅謚  
武襄

梁震新野人廉勇善訓士嘉靖中充陝西總兵官晉右

都督十五年移鎮大同卒數亂繼李瑾者魯綱  
威不振兵益驕廷議以為憂移震往震素蓄健兒五  
百人至則令軍中曰我無爾陵爾無我叛健兒輩又  
時時恐喝鎮兵鎮兵素憚震繇是帖服寇入犯震破  
之牛心山斬級百餘寇憤駐近邊伺隙時車駕祀山  
陵震伏將士於諸路寇果入大破之宣寧灣又破之  
紅崖兒斬獲甚衆晉左都督毛伯溫督師與震修鎮  
邊諸堡不數月功成卒贈太子太保賜其家銀幣加

贈太保謚武壯震前後百十戰未嘗少挫時率健兒  
出塞劫敵營及卒健兒無所歸守臣以聞編之伍邊  
將猶得其力代震者祝雄遼東人自山西副總兵移  
鎮大同雖被劾解職而以善撫士聞後鎮薊卒薊人  
祠之

惠之翰清澗人嘉靖間以舉人任大同通判時鴈門糧  
餉奸人侵漁翰廉而寘之法飲水茹蘗遇事能身任  
不辭勞怨嘗語人曰苟利於民此官可棄何恤乎人

言

鄭洛字萬秀安肅人嘉靖三十五年進士隆慶時為山西參政佐總督王崇古款俺答有功萬歷二年擢右僉都御史巡撫山西移大同加右副都御史入為兵部右侍郎七年以左侍郎總督宣大山西軍務昆都力子滿五大令銀定入犯洛奏停貢市遣使責俺答罰贖駝馬牛羊乃復許款辛愛襲封三娘子率眾西走辛愛自追之洛遣人婉諭三娘子乃聽命歸辛愛

貢市惟謹以功加兵部尚書兼右副都御史十四年  
捨力克當襲三娘子以年長自練兵萬人築城別居  
洛復婉諭捨力克遂妻三娘子嗣封并奏封忠順夫  
人定市馬數宣府不得踰三萬大同萬四千山西六  
千而申飭將吏嚴備以防盜竊且無輕過其部落馳  
獵者上嘉納之自太子少保累加至太子太保召為  
戎政尚書十八年洮河用兵詔兼右都御史經畧陝  
西延寧甘肅及宣大山西邊務時捨力克遺洛書以

赴青海仰華寺為名洛使從塞外行又諭忠順夫人  
曰彼中撫賞不能多且王家在東恐有內顧憂也尋  
詔洛經畧七鎮捨力克與忠順夫人諭罪請歸洛進  
兵青海尚書石星以宣大事急請速召洛究欵戰之  
計洛既至與總督蕭大亨巡撫王世揚邢玠等上疏  
曰捨力克諉罪火落赤真相桀驁之跡已斂且其部  
落數千里部長十餘輩在巢保疆者宣鎮則青把都  
兄弟未嘗東窺而兀慎擺腰五路之在新平馴服猶

故在西行牧不他失未嘗窺莽刺捏工而大成比妓  
則又歸巢獨先今以一人之罪槩絕諸部消往日之  
恩開將來之隙臣未見其可今史二外背屢擾邊疆  
若令順義王縛獻以著信然後酌議市賞在我固未  
為失策也議遂定尋加少保召理戎政順義王果縛  
史二來獻復款如故洛謝病歸卒贈太保謚襄敏  
馬芳字德馨蔚州人十歲為寇所掠潛自亡歸周尚文  
鎮大同奇之署為隊長數禦寇有功嘉靖二十九年



授陽和衛總旗戰威遠斬級九十禦寇新平堡復有  
功無何戰泥河大破之累遷指揮僉事三十六年守  
宣府寇大入山西芳一日夜馳五百里及之七戰皆  
捷隆慶元年山西總兵申維岳等敗於石州伏誅而  
副將田世威參將劉寶繫獄芳乞寢廕子為二將贖  
御史王沂劾之時大同被寇視宣府尤甚總督陳其  
學令總兵官趙奇扼紫荆關寇乃縱掠懷仁山陰間  
奇坐貶三秩遂調芳與易鎮俺答犯老營堡總兵郭

琥堅壁待寇遂趨應朔芳亦嚴為備乃西攻平虜城  
參將張剛厚遺之令移犯威遠幾破會其學率胡鎮  
等救而芳軍亦至相拒十餘日乃走芳謂諸將曰大  
同非宣府比與我間一牆耳寇不時至非大創之不  
可乃將兵出右衛戰威寧海子破之萬厯中卒芳戰  
朔州登鷹巢鴿子堂大沙灘暨宣鎮未嘗不大捷威  
名震邊陲為一時將帥之冠

趙奇榆林人以左副總兵協守大同嘉靖三十二年再

遇辛愛衆後復署大同副總兵事隆慶時鎮大同常督將士搃巢獲首功又大敗寇兵弘賜堡被賚磨子千戶萬厯初僉書中府卒

翁萬達字仁夫揭陽人嘉靖五年進士二十三年為兵部右侍郎兼右僉都御史代翟鵬總督宣大山西保定軍務謹偵候明賞罰每當防秋發卒乘障陰遣卒傾硃於油察離次者硃其處卒歸輒縛毋敢復離次嚴殺降禁違輒抵死得降人撫之如所親以是益知

敵情寇數萬騎犯大同中路入鐵裏門故總兵張達力戰却之又犯鵲鷓峪參將張鳳諸生王邦直等戰死萬達與總兵官周尙文備陽和而遣騎四出邀擊屢有斬獲寇登山見官兵大集乃引去事聞賜勅獎賚屢疏請修築邊牆議自大同東路至宣府西陽和須帑銀二十九萬上已許之兵部以大同舊有二邊可扼敵騎不當復於三邊內築牆上不聽乃自大同東路天城陽和開山口諸地為牆百二十八里堡七

墩臺百五十四而宣府亦為牆六十里功五十餘日  
成晉右都御史發代府宗室充灼等潛謀晉左都御  
史已會宣大山西鎮巡官議上邊防修守事宜大畧  
謂先年山西防秋止守外邊比棄極衝守次邊非守  
要意併守之議實為善經因條上定規畫度工費二  
者為修邊之事慎防秋併兵力重責成量徵調實邊  
堡明出塞計供億節財用八者為守邊之事上悉報  
許乃請帑銀六十萬兩修大同東路宣府西路邊牆

凡八百里工成予一子官萬達精心計善鈎校墻堞  
近遠濠塹深廣曲盡其宜寇乃不敢輕犯墻內戍者  
得以暇耕牧邊費亦日省初客兵防秋歲帑金一百  
五十餘萬添發且數十萬其後減省幾半又議掣山  
西兵併力守大同巡撫孫繼魯阻之上為逮繼魯萬  
達更事久上深倚之所請無不從獨俺答貢事石天  
爵款鎮遠堡業為巡撫龍大有所磔信使絕五年會  
玉林衛百戶楊威被掠復遣使偕威款大同左衛塞

邊帥家丁董寶等徂天爵前事殺之萬達言北敵弘  
治前歲入貢疆場稍寧自虞臺嶺之戰覆我師侵犯  
四十餘年石天爵之事臣嘗痛邊臣失計今復通款  
即不許當善詞諭遣誘而殺之此何理也請亟誅寶  
等榜塞上明告以朝廷德意解其蓄怨構兵之謀不  
聽既而復奉印信番文詣邊萬達又言臣等封疆臣  
貢亦備不貢亦備兵部尚書陳經請責萬達十日內  
回奏而使適未至尋李天爵復至詞益恭萬達又言

今宣大興版築正當羈縻使無擾請限以地以人  
時上責其瀆奏卒不許時曾銑議復套夏言王之故  
力絀貢議萬達復議套功難成不省二十七年三月  
又言諸部求貢不遂慚且憤聲言大舉上切責之通  
貢議乃絕八月俺答犯大同不克退攻五堡官軍戰  
彌陀山却之趨山西復敗還尋以宣撫曹家莊功晉  
兵部尚書兼右副都御史召理部事艱歸卒隆慶中  
謚襄毅萬達臨陣嘗身先士卒尤善御將士得其死



力嘉靖時邊臣行事適機宜建言中肯竅者萬達稱首

王邦直磁州人偉幹多力嘗持千斤器移數處不為疲  
號千斤以臺諫薦兵部檄送督府翁萬達待以殊禮  
分坐談邊務乙巳秋北部入犯鵝鶻峪邦直佐守將  
張鳳射却之轉戰而前敵大合鳳與邦直結方陣以  
拒之鳳戰死或勸邦直潰圍出邦直撫膺曰吾誓以  
腔血報軍門鳳死吾豈忍獨生遂揮刃向前擊殺數

人知不得脫乃自剄翁為疏請錄卹立祠祀之

俞大猷字志輔晉江人從趙本學學易推行兵家奇正  
虛實之權從李良欽學劍棄諸生嗣世職百戶舉嘉  
靖十四年武會試二十一年俺答大入山西詔天下  
舉武勇士大猷詣巡按御史自薦上其名兵部毛伯  
溫為尚書送之宣大總督翟鵬所召見論兵事大猷  
屢折鵬鵬謝曰吾不當以武人待子下堂禮之驚一  
軍然亦不能用後為浙江總兵勤岑港倭幾平而御

史劾之令立功塞上大同巡撫李文進習其才與籌  
軍事乃造獨輪車拒敵馬嘗以車百輛步騎三千大  
挫賊安銀堡文進上其制於朝遂制兵車營京營有  
兵車自此始文進將襲板升謀之大猷果大獲詔還  
世蔭寇掠廣武復拒却之萬歷初卒於後府僉書贈  
左都督謚武襄

方逢時字行之嘉魚人嘉靖二十年進士隆慶四年正  
月為右僉都御史巡撫大同俺答入威遠堡別部攻

靖魯伏兵却之冬俺答孫把漢那吉來降告總督王  
崇古曰機不可失也遣中軍康綸率騎五百往受之  
與崇古定計挾把漢以索叛人趙全等遣百戶鮑崇  
德出雲石堡語俺答部下五奴柱曰欲還把漢則速  
納款若以兵來是速之死矣五奴柱白俺答邀入營  
說以執趙全易把漢俺答心動遣火力赤致書逢時  
而是時全方從史用兵俺答令子辛愛將二萬騎入  
弘賜堡兒子永邵卜趨威遠堡自率眾犯平虜城逢

時曰此必趙全謀也全嘗投書逢時言悔禍思漢欲復歸逢時以示俺答俺答大驚有執全意及戰又不利乃引退辛愛猶未知奄至大同逢時使人持把漢箭示之曰吾已與而父約以報汝辛愛執箭泣曰此吾弟鐵背台吉故物也我來求把漢把漢既受官又有成約當更計之乃遣部下啞都善入見逢時曉以大義檄而遣之辛愛喜因使求幣逢時笑曰台吉豪傑也若納款方重加爵賞何愛此區區損盛名辛愛

大慙復遣啞都善來謝曰蒙太師教幸甚故將田世威亦讓其使使還報俺答召辛愛還東行宣府總兵趙竒遇之復繇大同北去巡按御史姚繼可劾逢時輒通寇使屏人語導之東行嫁禍鄰鎮大學士高拱曰撫臣臨機設策何可洩也但當觀後劾不宜先事輒易上然之俺答乃遣使定約夜召全等計事即帳中縛送大同逢時受之崇古亦送把漢歸逢時以功晉兵部右侍郎兼右僉都御史甫拜命以憂歸後崇

古入理京營神宗問誰可代者大學士張居正以逢  
時對萬厯初起故官總督宣大山西軍務始逢時與  
崇古共決大計而貢市之議崇古獨成之逢時復代  
崇古乃申明約信二人首尾共濟邊境遂安累晉兵  
部尚書兼右都御史總督如故加太子少保五年召  
理戎政復列上五事又上款貢圖等為兵部尚書累  
加少保致仕卒逢時功名與崇古相亞時稱方王

王宗古字學甫蒲州人嘉靖二十年進士喜談兵具知

諸邊阨塞隆慶四年正月總督宣大山西軍務禁邊  
卒關出而縱其素通寇者深入為閭又檄勞番漢陷  
寇軍民率眾降及自拔者悉存撫之歸者接踵西番  
瓦剌黃毛諸種一歲中降者踰二千人冬十月俺答  
孫把漢那吉來降留之大同慰藉甚至詔授指揮使  
賜緋衣一襲許俺答互市遂縛叛人趙全等以獻加  
太子少保兵部尚書遂定封俺答順義王昆都力卒  
愛吉能等授官有差崇古乃廣召商販聽令貿易布



帛菽粟皮革遠自江淮湖廣輻輳塞下因收其稅以  
充犒賞其大小部長則官給金縉歲市馬各有數崇  
古仍歲詣弘賜堡宣諭威德諸部羅拜無敢譁自是  
邊境休息東起遵永西抵嘉峪七鎮數千里軍民樂  
業不用兵革詔晉太子太保萬厯初召理戎政加少  
保晉兵部尚書致仕卒贈大保謚襄毅崇古獨任貢  
市貽五十年太平之福海宇內外胥頌社稷臣為宣  
大總制冠

鄭汝璧縉雲人隆慶戊辰進士潛心理學讀書得其精  
要由部曹歷陞兵部右侍郎兼僉都御史都督宣大  
山西軍務涖任疾作然講戰守撥行諸道修城堡練  
士卒治器械不自知其憊也乞罷歸至山東荆門驛  
卒著有律解謚類鈔帝后紀畧功臣封爵考由庚堂

文集

許希孟固始人隆慶間分巡大同僉事強幹有威望凜  
凜以風紀自持當時頌其績者有政如水霜奸宄消

亡之句

韓應元歷城人隆慶初以進士知懷仁縣釐正祀典均  
平夫役至今猶遵其法陞評事

劉復禮山海衛人隆慶間以舉人知渾源州介直廉明  
御下嚴肅刑清政簡賑恤貧寒有禱雨立應苦井變  
甘之異郡人立石頌德洫八年陞工部員外老幼攀  
卧不忍舍

傅延耆歷城人隆慶間以貢知應州性極端方政惟節

愛辨山糧不辭利害值寇訐大有擔當祀名宦

程遜長垣人隆慶間以進士知廣昌縣廉介慈祥輕徭薄賦鋤豪強削浮費加意學校講課不倦調南陽歷

官侍郎

劉祐字淑修號拙齋東萊掖人嘉靖癸丑進士由司理累擢都察院右僉都御史巡撫大同大同為九邊要害地去寇最近俺答吉囊方相繼深入陷石州屠昌黎塞下岌岌咸為祐難之祐諏咨利害得其要領謂

雲中西聯東勝東接右衛聲勢連絡自二邊失守以  
險予敵五堡之役復以兵亂不終遂孤懸不支宜乘  
時聚落番休控險成犄角之勢漸復五堡援右衛屯  
田訓士且戰且守庶有寧宇於是相地形增亭障稽  
覈耗漏率勵勇敢戒諸將各守分地毋輕出塞邊政  
大舉寇不得利引去間一入寇督兵禦之俘斬數百  
奪馬牛羊千數捷聞賜白金文綺陞俸一級寇自是  
稍挫其部落多來降祐疏請便宜處置千人以上則

爵其魁游徽卒敢遮掠者罪制曰可當是時徽祐雲中幾殆然祐治軍嚴諸紈袴子弟不得竄籍冒功遂騰蜚語祐亦以念母甚移疾乞歸時年四十三

陳鳳榆林人襲世廕嘉靖二十八年代周尚文為大同總兵官寇直抵寧武追至鷓兒嶺戰二日寇遁坐失事奪職薦起固原游擊三十二年七月援浮圖峪大戰移日寇疾馳遁晉署都督僉事賜賚有加三十六年三月戰歿常樂堡

吳允字君澤紹興山陰人嘉靖三十八年進士釋褐十三年隆慶五年遂擢右僉都御史巡撫宣府前此未有也嘗偵俺答離營獵從五騎直趨其營守者愕控弦從騎呵之曰太師來犒軍耳皆拜跪迎尊且獻酪允遍閱廬帳抵暮還而尤善結三娘子加兵部右侍郎萬曆五年夏代方逢時總督宣大山西軍務俺答西掠瓦刺聲言迎佛寄帑於允留旗箭為信尚書王崇古奏上方畧使允諭俺答繞賀蘭山後行勿道甘

肅又陰其謀於瓦剌俺答兵遂挫留青海而青把都部下時入寇大學士張居正令允趣俺答東還約束之青把都亦罰治其下款貢乃益堅七年秋以左侍郎召還部晉太子少保兵部尚書卒

艾杞米脂人隆慶間大同分巡道僉事躬自儉約以率僚屬餽遺一無所受人亦卒不敢遺時值邊警杞內紀軍餉外佐戎行境賴以安以勞瘁卒於官

郭琥字宗器永昌衛人繇總旗積首功隆慶時為大同



副總兵又任山西尋代馬芳鎮大同以貢市功累晉右都督萬曆十一年以老乞休晉都督致仕卒琥與趙岢皆宿將知名琥潔廉好籌畫識軍進止

吳百朋字惟錫義烏人嘉靖二十六年進士歷兵部右侍郎萬曆初命閱視宣大山西三鎮百朋以糧餉險隘兵馬器械屯田鹽法番馬逆黨八事核邊臣督撫王崇古吳允總兵郭琥以下陞賞黜革有差又進邊圖凡關塞險隘番族部落士馬強弱亭障遠近歷

歷如指掌後拜刑部尚書卒

王基號對滄青州衛進士萬曆初大同知府重節義戢橫暴熟諳邊務陞分守河東道興利剔弊保釐多方十一年復任河東道人皆鼓舞歡呼迎者塞路下車問民疾苦如家人父子惠政周洽十六年巡撫大同謹斥堠明賞罰練將士裁冗費通商賈嚴懲強禦奏錮豪宗四民寧帖邊方晏安累官戶部尚書

馬應圖平湖人萬曆五年進士為南京禮部郎中十三

年上疏譏切執政又力詆給事中齊世臣御史龔懋  
賢蔡系周孫愈賢吳定而咸稱吳中行趙用賢沈思  
孝李植諸人忤旨謫大同典史後為禮部員外郎卒  
曾乾亨字於健吉水人同亨之弟也萬曆五年進士歷  
光祿少卿十八年冬敕兼監察御史閱視大同邊務  
劾罷總兵官以下十餘人大同土兵歲餉萬二千石  
自徵之民不勝擾乾亨議留兵二百餘盡汰之屢  
奏邊備事宜輒中機要晉太理少卿歸卒

傅好禮字伯恭固安人萬厯初進士為御史進太常少卿二十六年奸民張禮等偽為官吏據近京要地稅民間雜物好禮極論其害謫廣昌典史請急歸卒天啟中贈太常卿

涂宗濬字鏡源江西南昌人萬厯中以進士官御史累按廣西河南順天諸處後巡按山西游歷山西宣大總督晉尚書加太子太保總督如故尋以順義王就封廕世襲錦衣千戶未幾乞休歸久之復起山西宣

大總督以老疾辭不得與櫬以赴甫數日遽卒宗濬  
前在鎮時持大體能得將士心聞復任咸踴躍比捐  
館多嘆息泣下者贈少傅謚忠襄

崔景榮字自強長垣人萬曆十一年進士授平陽府推  
官萬曆末為兵部右侍郎宣府大同總督累晉吏部  
尚書以忤魏忠賢削奪崇禎初復職卒贈少保

梅國楨字克生麻城人少雄傑自喜善騎射萬曆十一  
年進士嘗以御史平寧夏哮氏累遷右僉都御史巡

撫大同久之遷兵部右侍郎總督宣大山西軍務在鎮三年節省市賞銀十五萬兩有奇卒贈右都御史馬林芳子繇廕累官大同參將萬曆二十年順義王扯力克繫獻史車二部長林以制敵功晉副總兵四十七年殉開原

湯北京字伯閑宜興人萬曆二十年進士為御史巡按宣府大同請罷稅使中官張亦礦使中官王虎王忠不納入掌河南道卒天啟中贈太僕寺少卿

賈應元遵化進士累官右僉都御史萬厯間巡撫大同  
舉羨餘贖鍰以勞軍市馬各路堡砦凡土築者奏請  
磚包之與總兵郭琥重修興雲橋備極壯麗官終兵  
部左侍郎

劉克勤莊浪人萬厯間以貢知廣昌縣興利除害弊實  
一清官養驛馬輕減繇役祀名宦

連格禹州人萬厯間知大同縣悃悞無華綽有古風遇  
事剖決如流悉得其情士民德之陞御史

汪煥休寧人萬厯間以進士知廣昌縣端正嚴凝一塵不染與民休息境內又安陞主事

陳汝暘高安人萬厯間以貢知廣昌縣軫念民瘼作興學校刑清政簡多所營繕士民建祠立碑頌德

趙之韓汜水人萬厯間以舉人知渾源州立政存心皆為地方起見郡人沐其德化立祠尸祝

沈學無錫人萬厯間以舉人知渾源州學正下惟攻苦擁比課讀每聚諸生講論輒過丙夜會文手定甲乙



講席弘開教思無窮

范錫定興人萬厯間以舉人任大同東路同知慈祥廉  
幹動為邊民造福規百年之計創建廣積倉宏敞精  
密甲於雲鎮甄包南關皆其營度歲獻多方贍救民  
賴以活至於加意學校而計室家給資斧即家人父  
子不啻焉迄今父老思念其子孫累登甲第人謂廉  
吏之報

田應揚直隸鷄澤人萬厯間以舉人任廣昌縣知縣嘗

清丈地畝命僕役攜糗糧以從民有奉飲食者未嘗  
一下箸後擢忻州知州

袁化中字民諧武定人萬曆三十五年進士泰昌元年  
為御史劾首輔方從哲天啟元年出按宣大有聲以  
憂歸四年起掌河南道力劾魏忠賢崔呈秀回道考  
覈又據實列上乃以推山西巡撫謝應祥事調之外  
已竄入汪文言詞下詔獄斃之崇禎初贈太僕卿

胡良機字省之南昌人萬曆四十四年進士天啟初為

御史言魏忠賢欲門生宰相斥去崇禎初起故官按  
宣大年滿當代褒以敏練令復巡一年尋為宣府監  
視中官王坤劾罷終南京吏部主事

王象雲山東新城人天啟五年進士知大同縣擢御史  
言吏部尚書王永光用一仙克謹而山西壞不納已  
劾大學士溫體仁官終山西參議

張宗衡臨清人萬曆四十一年進士天啟七年五月為  
右僉都御史代張翼明巡撫大同引宿將滿桂為助

大修邊防時虎墩兔議順義故時額賞起王象乾督  
宣大令任款事象乾定撫議宗衡初與同議後力言  
宜戰不宜款檄總兵王牧民副使宋統殷閉不許通  
市乃上疏曰自插部駐歸化城去大同僅三百里閱  
時三月未敢近大同一步我固無如插何插亦無如  
我何則以饑寒窮困插與我不異爾插賴撫賞為命  
兩載不領資用已竭加以巢穴未定半懷攜貳東西  
馳驅勞頓已甚其駐牧處草根皆盡馬瘦如柴暴骨

成莽屢索我迎風諸禮望歎不啻望歲而我墮其計  
中厚遺以金繒牛羊米粟諸物是插本窮而我固富  
之插本弱而我固強之我有利不得自利又轉以為  
插利豈不痛哉使彼有纖毫懷德之意猶之可也乃  
往來講議其咆哮之狀悖慢之辭至不忍聞彼窮餒  
猶如此草青馬肥憑陵狂逞可勝道哉臣謂惟此時  
可以圖插幸聖明速決上報曰宗衡既知歎不足恃  
當實圖戰守無取空言象乾疏請專任撫臣上乃責

宗衡先後異議兵科給事中陶崇道復力駁之宗衡再疏曰插賞新者八萬一千加以馬價大同兩年二十四萬山西兩年十萬宣府十八萬遼東兩年四十萬共百萬矣當此三空四盡之秋忽舉百萬以款敵臣實不解謂不款能患我耶臣抵大同九月矣未嘗談一欸字彼亦未敢近邊謂借欸方可修備耶臣方造火炮演車陣整器械葺邊垣何嘗一日不修備彼亦何能禁我之不修以插之疲甚饑甚困窮甚忽睹

此百萬金錢一去而不返也臣安得不痛憤乎撫敵何如撫士資寇何如滅寇臣揣時度勢計當如此而時局不容請賜罷斥象乾亦再疏陳利害兵部尚書王洽言宣府二十三萬大同十二萬山西五萬合之四十餘萬乃俘馬價所謂互市也又奏宗衡議戰欲得京營馬萬五千火器三萬計一馬費二十金當三十萬一火器費三十金當九十萬此百二十萬安能驟應宗衡但知插部饑疲不知自吞并諸部人馬衆

盛即戰亦豈能必勝後竟如象乾議宗衡抗疏力辨  
詆象乾專任王牧民之非且求罷斥不允四年春魏  
雲中罷擢宗衡兵部右侍郎代之五年五月得勝堡  
幾失與巡撫張廷拱並鐫級視事監視中官劉允中  
極陳殘破狀參議王則古疏白其誣乃不問時綏寇  
入山西部議宗衡移駐平陽統虎太威李卑賀人龍  
左良玉諸將兵以平陽澤潞四十一州縣屬之巡撫  
許鼎臣駐汾州統張應昌苟伏威頗希牧艾萬年諸



將兵以汾太沁遼三十七州縣屬之宗衡聞命即提  
陽和兵從澤州尾賊至陵川勝之再敗賊潞安之西  
火斬級二千連戰陽城之陽泉沁水之毛連溝鹿臺  
寺石塔杏谷並破之俘斬皆千人已卑人龍萬年以  
關中兵至鼎臣檄從己宗衡怒檄三將還賊遂轉入  
磨盤山乘間從武鄉陷遼州宗衡強起舊帥尤世祿  
使率人龍卑赴援六年正月復其城會秦將曹文詔  
至與猛如虎屢破賊賊漸衰時張應昌任山西總兵

五檄之不至怒而言於朝俄以賊窺河北乞勅山西撫鎮率罕萬年馳勸毋以臣為孤注語多侵鼎臣鼎臣亦劾宗衡所舉監軍主事李綦會賊果入河北宗衡乃還陽和時虎墩兔遠竄部下無所歸多叩關乞降宗衡受之安輯者萬二千餘人大同自是無插部患七年五月崞縣靈邱諸城堡多破命戴罪視事旋命盡督諸鎮援軍而援將吳襄尤世威等皆不至九月論罪謫戍十五年臨清破死於兵予卹典

劉以守雲南籍浙江分水人天啟間以舉人任山陰縣知縣山陰為邊陸地保障尤亟以守有應變畧又明於形勢蒞任後改河道築圍墻濬池濠製懸樓屹然巨鎮焉

滿桂蒙古人家宣府勇敢便騎射為督師大學士孫承宗所知累遷掛印總兵官賜尚方劍加太子太師崇禎元年七月大同總兵渠家楨失事以桂代之大同久恃款弛備插部西侵順義王遂入境大掠家楨及

巡撫張翼明論死插部遂挾賞不去桂至徧歷八路七十二城堡大修守備軍民恃以無恐二年正月帥五千騎入衛十二月拜武經畧戰歿贈少師建祠

焦源溥字涵一三原人萬曆四十一年進士崇禎二年為分巡河東道副使預平大盜王嘉印遷寧武參政再有平寇功就遷山西按察使七年擢右僉都御史巡撫大同時兵缺餉乏歲浚饑民無糠粃亟請蠲賑且增兵餉當事不能應踰年遂自劾求去監視中官

魏國徵撫論其不職坐罷歸十六年為流賊拔舌支解死

曹變蛟文詔從子也幼從文詔以功歷遊擊崇禎四年從復河曲文詔移山西從戰輒勝及文詔改鎮大同山西巡撫許鼎臣言晉賊紫金梁雖死老回回過天星大天王蝎子塊闖塌天諸渠未滅變蛟驍勇絕人麾下健兒千百才乃文詔亞乞留之晉中從之七年文詔困大同又自湖廣命北援七月力戰廣武守備

王國棟陣亡事定言官劾其冒功上不問冬文詔謫  
戍變蛟亦以疾歸後為東協總兵官十五年二月殉  
城於松山贈太子少保

馬剛中字九如商城人崇禎七年進士授大同知縣行  
取入都上臨軒策試授檢討十四年二月賊陷商城  
大罵磔死

蔣秉采字衷白全州人崇禎中知靈邱縣七年八月募  
兵守城合門殉之守備于世奇把總陳彥武馬如牙

典史張標教諭路登甫胥鬪死贈卹如制

丘民仰字長白渭南人萬厯中舉於鄉崇禎中為御史  
山西巡撫宋統殷專主撫下令殺一流賊者償二命  
賊愈張民仰疏論其罪後為大同副使十五年以右  
僉都御史巡撫殉節

盧象昇字建斗宜興人少讀張巡岳飛傳輒歎息曰吾  
得為斯人足矣舉天啟二年進士崇禎八年八月總  
理江北河南山東湖廣四川軍務尋晉兵部侍郎加

督山西陝西軍務賜尚方劍便宜行事殲流寇幾盡  
九年九月宣大總兵梁廷棟卒遷兵部左侍郎總督  
宣大山西軍務宣大素苦缺餉乃大興屯利行二年  
積穀至二十萬上諭九邊奉以為式十一年三月以  
生辰方舉觴侑客謀報西部乞炭台吉數萬騎入邊  
求市即夜督兵出羊房口尅期決戰乞炭解去越二  
月外艱廷議奪情留任四疏懇請上哀之特起陳新  
甲制中令象昇候代新甲家四川未上乃墨練從事



尋晉兵部尚書九月督山西總兵楊國柱王撲虎大  
威諸軍入援十二月朔殉節贈太子少師兵部尚書  
洪印衡商城人萬曆中進士歷官陽和兵備副使崇禎  
十四年二月流賊陷商城力戰死

衛景瑗字仲玉韓城人天啟五年進士崇禎十五年二  
月為右僉都御史巡撫大同歲饑且疫疏乞賑濟給  
牛種民獲甦乃戢豪宗蒐軍實練火器聲績甚著十  
七年正月李自成將犯山西宣大總督王繼謨檄大

同總兵姜瓖扼之河上瓖潛遣部將李時華納款而  
還景瑗不知也及山西陷邀瓖敵血誓死守瓖布訛  
言衛巡撫秦人將應賊代王果疑之不與相見永慶  
王至射殺其僕會景瑗有足疾不時出兵事皆瓖主  
之瓖兄瑄以昌平總兵失律繫獄後赦出就瓖力勸  
降賊瓖虞卒不從人攜銀數兩不足則予布帛佯言  
勵將士固守王及士民咸信之諸郡王分守城門瓖  
每門遣卒二百助守至三月朔賊抵城下瓖即射殺

永慶王開西門迎賊使人詐要景瑗議事景瑗乘馬  
出知有變自墜馬下俄為賊所執見自成自成欲官  
之景瑗不屈據地坐大呼莊烈帝而哭賊義之曰忠  
臣也不殺景瑗猝起以頭觸階石血淋漓賊引出顧  
見瓌罵曰反賊與我盟而即叛神其赦汝耶賊使景  
瑗母勸景瑗降景瑗曰母今年八十餘當自為計兒  
國大臣不可不死母出景瑗謂人曰吾不罵賊者以  
全母也六日自經於僧寺賊歎為忠臣移妻子空舍

戒無犯

焦源清字湛一三原人源溥之從兄也萬厯中進士歷山西右布政使擢巡撫宣府後為賊執不食死

王宗文龍游人崇禎間以貢任大同縣丞清勤樂易禮士愛民運粟米以濟餉買硝磺以急公一時號為真父母

劉世治遼東人崇禎間以貢知廣昌縣撫恤羣黎勞心驛遞加意學校凡所營繕并不擾民

程良球黃岡人崇禎間以舉人知渾源州申革草商除  
民大害以憂去士民戴之

崔廓任邱人崇禎間以舉人知懷仁縣條編官租成熟  
起課民免包賠至今永賴

張朝綱廣通人由貢生授渾源州同知解職歸後寇孫  
可望等兵至死之

楊士英西平人為懷仁知縣後賊陷西平死之子婦王  
亦死

徐有聲字聞復金壇人登鄉薦以戶部郎中督餉大同十七年李自成陷城不屈死

李倬崇禎末為山陰知縣流賊至死之

朱家仕河州人崇禎末為陽高分巡副使流賊至盡驅妻妾子女入井而已從之一家死者十六人

國朝

周官順治元年任渾源州吏目直指嘗薦之姜逆之亂死其官

李吐馨陝西同官人順治二年官靈邱縣典史姜逆之  
變集城下者數千人令素懼莫知所措吐馨招集  
鄉勇激以大義慷慨登陴士民胥感泣地當賊衝獨  
屹然堅守論者韙之

王度山東人順治三年以進士任大同縣知縣有能聲  
姜逆之亂道府符篆多失獨縣印存親王統師來  
討平西將軍印時猶未頒布檄徵餉調兵緊縣印是  
賴度善招撫懷仁諸地以次定督運勸輸搜馬擒寇

胥有功叛黨造度手書投營前王知其樸忠出書示之度勃怒檄詆賊家人九口胥為賊殺事平議叙官至太常寺卿

梁化鳳字澧源陝西長安人順治三年以武進士官陽和高山衛守備精騎射饒謀略善撫軍士能得其死力姜逆之變以忠義激勵之令厲兵以待大兵進勦遂率所部從臨陣振臂大呼矢石如雨不少避大小七十餘戰所向有功七年四月收復郡三州一縣



五衛二城八堡十寨八臺三洞十五胥克宣力焉晉  
都督僉事後平海寇功尤偉擢提督授三等阿思哈  
尼哈番卒贈少保兼太子太保謚敏壯

項一科順治四年任大同縣縣丞有能聲姜逆之亂以  
死勤事

張肇斌順治五年任大同府西路同知姜逆之亂以死  
事著

榮爾奇山東德州人癸未進士由汾州冀南道左遷渾

源州知州剛毅明達政簡刑清愛民禮士姜逆之亂  
以身殉城至順治十六年知州張崇德始申請從祀  
本州名宦祠是以忠烈祠未載

佟養昇遼東人順治間奉

旨養馬大同姜逆之亂巷戰不屈以死

佟國仕遼東人順治間任井坪路參將姜逆之亂夜遣  
其黨周世德來襲國仕躍馬持兵驅衆巷戰既而城  
外舉火喊聲遙應遂為亂兵所殺蓋世德舊為國仕

屬員前後左右胥賊黨也

贈副將祀忠烈祠

管一舉順治間任得勝路參將死姜逆之亂

贈副將祀忠烈祠

李向堯遼東鐵嶺人順治間任助馬路參將姜逆之亂

闔戶殉節

贈左都督僉事祀忠烈祠

佟養量遼東人順治六年任宣大總督駐陽和時姜逆

初平骸骨遍野為斂而葬之又建報忠祠祀一時死  
事者嘗錄重囚有張發者業斃於獄矣其族多論死  
檢原案覆視特為豁免內丁揚洲玉寓齊生所獲藏  
鏹八百兩呼其子弟至悉畀之修學習禮教射其中  
會部議衛所屯田照內地民田例起科抗疏言邊地  
種遲霜早沙磧相望加以凶盜頻仍荒殘愈甚若復  
援例起科勢必聞風俱潰夫有人斯有財益下即益  
上此司計者所當知也疏上獲允雲中人至今感之

郎永清遼東廣寧人順治六年以監生知渾源州時姜逆初平永清首立義塚瘞殘骸乃招流亡督開墾詳豁逋賦一萬餘兩販易者給母錢俾通貨器殘民始有起色後以治行遷官去民為立祠祀之

宋起鳳滄州人順治十一年以副榜貢知靈邱縣靈邱經闖寇加以姜逆之亂民散田蕪賦役缺正額者以萬計起鳳力請蠲除獲免糧銀三千二百六十餘兩徭銀一千七百三十餘兩其他積逋並報罷流民漸

復業起鳳復時詣田間課之寔有起色解組攀轅卧轍者踵相續

譚從簡山海衛人康熙元年以舉人知靈邱縣靈邱逋賦累累前令宋業請豁免隨遣官以去從簡涖任雅諳民間利病百廢具舉瘡痍浸復當時謠曰前無宋憑誰種後無譚更不堪靈邱以循吏稱者二人為最曹溶字秋岳浙江嘉興人前進士康熙六年任陽和兵備道溶學問閎博處兵瑣戎索間賑荒馭吏胥有績

雅稱嘆徐明經化溥馮觀察雲驤才亟旌之時學政  
叢弊落籍制俾不敢逞魏敏果象樞雅參議焉尋以  
裁缺去仕至侍郎

董遂昇直隸河間人康熙九年以拔貢生知沁水縣甲  
寅遷大同府西路同知性敏給尤善聽斷不假鈎致  
具能得情偽在沁水催科有法賦集而民不病及同  
知大同重獄業定擬察其誣卒開釋之而寘奸徒於  
法所轄右衛為歸化咽喉兔毛河石雲諸堡尤號險

要兵民雜處和輯為難遂昇撫馭協體兵往來秦晉  
間事尅期胥集督撫監司皆倚重之後擢漢中府知  
府以去

石佳彛奉天人康熙二十年以監生知懷仁縣出金賑  
荒給牛種又以邑近邊文學遜內地立義學崇異諸  
生見者多興起在任五年擢黃平知府去民樹碑識  
之

王度漢陽人康熙十一年以副榜知靈邱縣度少讀書



時常嘆子產治鄭武侯治蜀得為治大體及涖官心存仁恕而能濟以嚴明吏民無敢軼繩外久而胥愛頌之以疾卒於署葛幃布被敝衣數襲而已百姓罷市往哭

董學詩遼陽人康熙二十六年任懷仁縣知縣年甚少而精敏待士撫民胥得治體革火耗清行戶立義倉飾廟學後二年歲飢勸輸以賑之民無流逋在任三年治行為當時最

翟熠字青黎聞喜人舉人康熙七年大同左雲川衛教  
授博學識大體考正禮器樂器詳請樂舞生演禮習  
樂申明條約嚴束士子立文武二社課文技藝邊陲  
之地彬彬有文物之風會試在京聞母訃即日歸里  
通庠士子製軸遣人在籍致祭後補太原府學待士  
一如雲川考正禮樂捐俸置龕十間照正祀考製名  
宦神牌一百三十位製鄉賢神牌一百九位修文中  
子祀奉檄纂修山西通志以疾歸卒於家所著有丁

祀考崇祀錄壽憲樓等集行於世



山西通志卷九十四

欽定四庫全書

史部

山西通志卷九十五

六

詳校官監察御史<sub>臣</sub>查善長

檢討<sub>臣</sub>德生覆勘

總校官進士<sub>臣</sub>朱鈞

校對官學正<sub>臣</sub>常循

謄錄監生<sub>臣</sub>龍翔

欽定四庫全書

山西通志卷九十五

名宦

十三

朔平府

漢

韓安國梁成安人嘗受韓子襍家說於鄒田生所事梁  
孝王有忠直聲建元六年為御史大夫元光元年雁  
門馬邑豪聶壹因大行王恢言上曰匈奴初和親

親信邊可誘以利陰使聶壹為間亡入匈奴曰吾能斬馬邑令丞吏以城降財物可盡得單于許之時安國與恢力辯卒從恢議伏車騎材官三十餘萬匿馬邑旁谷中衛尉李廣為驍騎將軍太僕公孫賀為輕車將軍大行王恢為將屯將軍大中大夫李息為材官將軍御史大夫韓安國為護軍將軍諸將皆屬護軍約單于入馬邑而漢兵縱發王恢李息李廣別從代主擊其輜重單于入漢長城武州塞覺引兵還

漢兵追至塞度弗及罷安國後行丞相事元朔二年  
卒

耿秉字伯初大司馬國子以父任為郎建初元年拜度  
遼將軍視事七年匈奴懷其恩信徵為執金吾章和  
二年封美陽侯永光三年卒謚曰桓侯

宋漢字仲和以經行著名舉茂才四遷西河太守又為  
度遼將軍立名節以威恩著稱拜大中大夫卒策曰  
宋漢清修雪白正直無邪前在方外仍統軍實懷柔



異類莫匪嘉績戎車載戰邊人用寧子錄乃勲引登  
九列因病退讓守約彌堅將授三事未克而終朝廷  
愍悼恒其愴然詩不云乎肇敏戎功用錫爾祉其令  
將相大夫會葬加賜錢十萬及其在殯以全素絲羔  
羊之節焉

耿曄字季遇順帝初鮮卑寇緣邊殺代郡太守暉以烏  
桓校尉率諸郡卒出塞討擊大破之自後頻出輒克  
獲威振北方遷度遼將軍

馬續字季則七歲能通論語博觀羣籍善九章算術順  
帝時為度遼將軍續所在有恩威稱

种嵩字景伯洛陽人仲山甫之後也舉孝廉桓帝時遷  
使匈奴中郎將後寇入并涼二州擢為度遼將軍嵩  
到營所先宣恩信誘降諸部其有不服然後加討羌  
虜先時有生見獲質於郡縣者悉遣還之誠心懷撫  
信賞分明由是羌胡龜茲莎車烏孫等皆來順服嵩  
乃去烽燧除候望邊方晏然無警入為大司農遷司

徒卒并涼邊人咸為發哀匈奴聞曷卒舉國傷惜單于每入朝賀望見墳墓輒哭泣祭祀

李膺字元禮潁川襄城人祖父修為太尉膺性簡亢無所交接唯以同郡荀淑陳實為師友舉孝廉累官烏桓校尉以公事免永壽二年鮮卑寇雲中桓帝聞膺能乃復徵為度遼將軍先是羌虜及疏勒龜茲數出攻鈔張掖酒泉雲中諸郡百姓屢被其害自膺到邊皆望風懼服先所掠男女悉送還塞下自是之後聲

震遠域後再為司隸校尉獨持風裁以名聲自高士  
有被其容接者名為登龍門遭黨事免歸起為長樂  
少府陳竇敗復廢張儉事起收捕鈎黨乃詣獄拷死  
段熲字紀明武威姑臧人舉孝廉延熹二年遷護羌校  
尉擊燒當等八種羌破之五年遷并州刺史六年冬  
復以熲為護羌校尉擊滇那等羌凡百八十戰悉破  
之封新豐縣侯後歷太尉司隸校尉楊球奏誅王甫  
并及熲遂飲鴆卒

皇甫規字威明安定朝那人祖父稜度遼將軍規舉賢  
良方正對策梁冀忿其刺己以為下第託疾免歸冀  
誅拜太山太守延熹四年為中郎將討破羌零吾後  
徵拜度遼將軍至營數月上書薦中郎將張奐以自  
代曰臣聞人無常俗而政有治亂兵無強弱而將有  
能否伏見中郎將張奐才略兼優宜正元帥以從衆  
望若猶謂愚臣宜充軍事者願乞冗官以為奐副朝  
廷從之以奐代為度遼將軍規為使匈奴中郎將及

與遷大司農規復代為度遼將軍規為人多意算自  
以連在大位欲退身避第數上病不見聽會友人上  
郡太守王旻喪還規縞素越界到下亭迎之因令客  
密告并州刺史胡芳言規擅遠軍營公違禁憲當急  
舉奏芳曰威明欲避第仕塗故激發我耳吾當為朝  
廷愛才何能中此子計耶遂無所問及黨事大起天  
下名賢多見染逮規雖為名將素譽不高自以西州  
豪傑恥不得與乃自上言附黨宜坐朝廷知而不問

時人以為規賢在事數歲北邊威服永康元年徵為尚書後封壽成亭侯邑二百戶讓封不受再轉護羌校尉卒

橋元字公祖梁國睢陽人舉孝廉桓帝末鮮卑南部及高句驪嗣子伯固並畔為寇鈔四府舉元為度遼將軍假黃鉞元至鎮休兵養士然後督諸守討擊及伯固等皆破散退在職三年邊境安靜後遷太尉卒

崔寔字子真涿郡安平人瑗子也舉至孝獨行明於政

體吏才有餘論當世便事數十條名曰政論指切時  
要言辯而確當世稱之拜議郎遷大將軍冀司馬與  
邊韶延篤等著作東觀出為五原太守五原土宜麻  
桑而俗不知織績民冬月無衣積細草而卧其中見  
吏則衣草而出寔至官斥賣儲峙為作紡績織絰練  
緼之具以教之民得以免寒苦是時寇連入雲中朔  
方殺略吏民一歲至九奔命寔整勵士馬嚴烽候寇  
不敢犯常為邊最先是瑗妻劉氏有母儀淑德博覽



書傳及寔在五原常訓以臨民之政寔之善績母有  
其助焉後拜尚書稱疾免歸卒

陳翔字子麟汝南邵陵人少知名善交結察孝廉太尉  
周景辟舉高第累遷定襄太守後坐黨事考黃門北  
寺獄以無驗見原卒於家

賈琮字孟堅東郡聊城人舉孝廉中平元年舉為交趾  
刺史民歌賈父又為冀州刺史州界翕然靈帝後大  
將軍何進表為度遼將軍卒於官

魏

田豫字國讓漁陽雍奴人鄆陵侯曹彰征代郡以為相  
彰平代皆豫策也魏文帝初持節護烏桓校尉比能  
彌加素利共要誓豫以戎狄為一非內地之利乃先  
構離之素利為比能所攻求救豫單將銳卒深入寇  
前後斷截豫從他道引去寇追到馬城圍之十重豫  
出其不意追擊破之烏丸王骨進桀黠豫因出塞按  
行單將麾下百餘騎入進部進逆拜遂使左右斬之

顯其罪惡以令衆皆怖懼不敢動便以進弟代進威震沙漠山賊高艾聚數千人寇鈔豫誘使素利部斬艾封長樂亭侯為校尉九年恒摧抑兼并乖散彊猾凡逋亡奸宄皆搆刺攬離使凶邪之謀不遂聚居之類不安而幽州刺史王雄支黨毀之遂轉為汝南太守領并州刺史外部聞其威名相率來獻豫性清約儉素賞賜皆散之將士素利等數來客見多遺牛馬豫悉轉送官皆以為前所遺物顯露不如持金乃密

懷金三十斤謂豫曰願避左右從之因跪曰我見公  
貧故前後遺公牛馬公輒送官今密以此上公可以  
為家資豫張袖受之答其厚意去後皆悉付外具以  
狀聞詔褒之曰昔魏絳開懷以納戎今卿舉袖以受  
狄金朕甚嘉焉賜絹五百疋豫以其半藏少府後復  
來以半給與外夷咸高豫節州界寧肅百姓懷之徵  
為衛尉稱疾食卿祿卒嘉平六年下詔褒揚賜其家  
錢穀

北魏

元安壽陽平王新城子景穆帝孫也高祖賜名頤累遷  
懷朔鎮大將都督三道諸軍事北討詔徵赴京勛以  
戰伐之事對曰當仰仗廟算使呼韓同渭橋之禮帝  
歎曰壯哉王言朕所望也未發遭母憂詔遣侍臣以  
金革敦喻既殯而發與陸叡集三道諸將議軍途所  
詣於是中道出黑山東道趨士盧河西道向侯延河  
軍過大磧大破蠕蠕頤入朝詔曰王之前言果不虛

也後除朔州刺史及恒州刺史穆泰謀反遣使推頤  
為主頤密以狀聞泰等伏誅帝甚嘉之景明六年薨  
於青州刺史謚曰莊

源懷隴西王賀子謙恭寬雅有大度襲爵拜征南將軍  
尋持節督諸軍屯於漠南又督諸軍征蠕蠕六道大  
將咸受節度遷尚書令後例降公加衛大將軍景明  
二年除車騎大將軍詔為使持節加侍中行臺巡行  
北邊六鎮恒燕朔三州賑給貧乏兼採風俗考論殿

最事之得失皆先決後聞自京師遷洛邊朔遙遠加  
連年旱儉百姓困弊懷銜命巡撫存恤有方便宜運  
轉有無通濟時后父于勁勢傾朝野勁兄于祚與懷  
宿昔通婚時為沃野鎮將頗有受納懷將入鎮祚郊  
迎道左懷不與語即劾祚免官懷朔鎮將元尼須與  
懷少舊亦貪穢狼籍置酒請懷謂懷曰命之長短由  
卿之口豈可不相寬貸懷曰今日之集乃是源懷與  
故人飲酒之坐非鞫獄之所也明日公庭始為使人

檢鎮將罪狀之處尼須揮淚而已無以對之懷既而表劾尼須其奉公不撓皆此類也懷又表曰景明以來北番連年災旱高原陸野不任營殖唯有水田少可苗畝然主將參僚專擅腴美瘠土荒疇乃給百姓因此困弊日月滋甚諸鎮水田請依地令分給細民先貧後富若分付不平令一人怨訟者鎮將已下連署之官各奪一時之祿四人已上奪祿一周北邊番鎮事異諸夏往日置官全不差別沃野一鎮自將已



下八百餘人黎庶怨嗟僉曰煩猥邊隅事尠實少畿  
服請主帥吏佐五分減二詔曰省表具恤民之懷已  
勅有司一依所上下為永準如斯之比不便於民損  
化害政者其備列以聞時細民為豪彊陵壓積年枉  
滯一朝見申者日有百數所上事宜便於北邊者凡  
四十餘條皆見嘉納正始元年九月蠕蠕率十二萬  
騎欲直趨沃野懷朔南寇恒代詔加使持節侍中出  
據北番指授規畧隨須徵發諸所處分皆以便宜從

事又詔懷子直寢徽隨懷北行詔賜馬一匹細鎧一具御稍一枝懷拜受訖乃於其庭跨鞍執稍大呼顧謂賓客曰氣力雖衰尚得如此蠕蠕雖畏壯輕老我亦未便可欺今奉廟勝之規總驍悍之衆足以擒其酋帥獻俘闕下耳時年六十一懷至雲中蠕蠕亡遁旋至恒代按視諸鎮左右要害之地可以築城置戍之處皆量其高下揣其厚薄及儲糧積仗之宜犬牙相救之勢凡表五十八條自魏歷齊北鎮諸戍東西

九城是也遷驃騎大將軍三年六月卒年六十三懷性寬容簡約不好煩碎恒語人曰為貴人理世務當舉網維何必須太仔細也譬如為屋但外望高顯楹棟平正基壁完牢風雨不入足矣斧斤不平斲削不密非屋之病也故府寺議謚靖謚穆而詔曰府寺所執並不克允愛民好與曰惠可謚惠公

宇文福其先南單于之遠屬也世為擁部大人福少驍果有膂力性忠清以信馭人甚得聲譽後除懷朔大

將至鎮卒

宋世景河南尹繇第三弟西河人徙廣平少自修立精  
經義族兄弁甚重之對策上第左僕射源懷引為行  
臺郎巡察州鎮十有餘所黜陟賞罰莫不咸允遷徙  
七鎮別置諸戍明設亭堠以備北部懷大相委重還  
薦於世宗曰宋世景文武才略當今寡儔清平忠直  
亦少其比陛下若任之以機要終不減李冲也後母  
喪毀卒撰晉書未就

婁寶代人伏連曾孫性淳樸好讀書明帝時為朔州刺史時邊事屢興人多流散及寶至稍安集之殘壤舊宅皆命葺構人歸繼路歲考為天下最

楊椿華陰人朔州刺史寬謹之性英敏之才內政修明外防甚肅

北齊

高叡小名須拔父琛高祖弟也封南趙郡公斛斯椿等釁結高祖將謀內討以晉陽根本召琛掌留後事以

為并肆汾大行臺僕射領六州九酋長大都督其相  
府政事琛悉決之卒謚貞平叡生三旬而孤聰慧夙  
成特為高祖所愛襲爵顯祖受禪晉王天保八年除  
北朔州刺史都督北燕北蔚北恒三州及庫推以西  
黃河以東長城諸鎮諸軍事叡慰撫新遷量置烽戍  
內防外禦備有條法大為兵民所安有無水之處禱  
而掘井鑿插截下泉源湧出至後號曰趙郡王泉九  
年車駕幸樓煩朝於行宮從還晉陽皇建初行并州

事孝昭臨崩預受顧託奉迎世祖於鄴突厥侵軼并  
州帝親御戎六軍進止皆令取叡節度以功復封宣  
城郡公世祖崩葬後數日議出姦倖和士開執之彌  
固乃被構算拉殺於雀離佛院

高勣字敬德清河王岳子改封樂安王出為朔州行臺  
僕射後主晉州敗太后從玉門道還鄴都敕勣統領  
兵馬侍衛時佞幸閹寺猶行暴虐民間雞犬悉放鷹  
犬搏噬取之勣收儀同三司苟子溢狗軍欲行大戮

太后有令然後釋之劉文殊竊謂勸曰子溢之徒言成禍福何容如此豈不慮後生毀謗耶勸攘袂語文殊曰自獻武皇帝以來撫養士卒委政親賢用武行師未有折衄今西寇已次并州達官多悉委叛正坐此輩專政弄權所以內外離心衣冠解體若得今日斬此卒明日及誅亦無所恨王國家姻婭須同疾惡反為此言豈所望乎後入周

段榮字子茂姑臧武威人祖信家於五原郡榮專意星



象高祖建義山東贊成大策為行臺右丞西北道慰諭大使巡方曉喻所在下之卒謚昭景

叱列平代郡西部人襲第一領民酋長孝昌末拔陵反叛茹茹餘衆入寇馬邑平以統軍屬有戰功後牧子作亂劉胡崦斛律可那律俱時構逆以平為都督討定胡崦等高祖起義平歸誠從平爾朱兆武定初除廓州刺史齊天保中卒謚莊

北周

李淑仁隴西人朔州刺史驍健有武力征伐多奇功

庫狄迴洛代人朔州刺史少有武力儀貌魁偉以果斷  
稱

隋

源雄字世略西平樂都人隴西王篡子周封朔方郡公  
隋歷朔州總管突厥來寇雄輒捕斬之深為北部所  
畏平陳進位上柱國復鎮朔州二歲徵還卒

郭衍字彥文太原介休人周儀同大將軍伐齊令衍從

陳王守千里徑又從戰於晉州追至高壁大敗之仍  
從平并州以功授上柱國累封武山郡公隋開皇五  
年授朔州總管所部恒安鎮北接番境常勞轉運銜  
乃選沃饒地置屯田歲剽粟萬餘石民免轉輸之勞  
又築桑乾鎮皆稱旨十年從晉王廣鎮揚州大業中  
再封真定侯卒謚襄

李充隴西成紀人慷慨有英畧開皇中授上柱國武陽  
郡公拜朔州總管甚有威名為寇所憚

裴肅字神封河東聞喜人開皇十七年自繕部侍遷朔州長史有能名

李克開皇中為朔州刺史有威名

王仁恭字元實天水上邽人仁壽中歷驃騎將軍從楊素擊平漢王諒進大將軍拜呂州刺史突厥寇邊詔以本官領馬邑太守始畢率騎數萬寇馬邑復令二特勒將兵南過時郡兵不滿三千仁恭簡精銳逆擊破之獲數千級并斬二特勒其後突厥復入定襄仁

恭率兵四千掩擊之斬千餘級大獲六畜而還尋為  
校尉劉武周所害

宇文弼字公輔洛陽人慷慨有大節博學多能歷朔州  
總管

韓果少驍雄善騎射以功歷陞朔州刺史

魚俱羅馮翊下邳人身長八尺膂力絕人聲氣雄壯言  
聞數百步累以戰功封高唐縣公進柱國仁壽中拜  
豐州總管初突厥數入境為寇俱羅輒擒斬之自是

突厥畏懼屏迹不敢畜牧於塞上後討賊劉元進等  
以誣死

楊廓大業中為朔州刺史煬帝北巡過代州邱和獻食  
甚精至朔州廓獨無所獻

唐

李素立趙州高邑人貞觀中累拜揚州都督府司馬初  
突厥鐵勒部內附即其地為瀚海都護府即燕然都  
護也詔素立領之時闕泥孰別部數梗邊素立以為

不足用兵遣使諭降夷人感其惠率馬牛以獻素立  
止受酒一杯歸其餘乃開屯田立署次虜益畏服封  
高邑縣侯綿州刺史後徙蒲州會卒高宗特廢朝一  
日謚曰平

田仁會雍州長安人擢制舉仕累左武侯中郎將太宗  
征高麗而薛延陀以數萬騎掩河內詔與執失思力  
率兵擊敗之尾逐數百里延陀幾生得璽書嘉慰六  
遷勝州都督境有宿賊依山剽行人仁會發騎捕格

夷之城門夜開道無寇跡累遷右衛將軍卒謚曰威  
程務挺洺州平恩人以軍功遷右領軍衛中郎將破突  
厥六萬騎於雲州永隆中阿史那伏念叛詔裴行儉  
討之務挺為副將仍檢校豐州都督時伏念屯東牙  
山務挺引兵赴之伏念懼乃間道降於行儉裴炎以  
為非行儉功封務挺平原郡公遷左武衛大將軍單  
于道安撫大使禦突厥善綏禦士服其威愛突厥憚  
之不敢盜邊後申救裴炎被害突厥聞之率相慶為



立祠每出師輒禱焉

唐璿字休璟京兆始平人明經高第永淳中為朔州長史突厥圍豐州都督崔知辨戰死時議棄豐保靈夏璿上疏詳陳其利害高宗從之以功封宋國公同中書門下三品卒贈荊州大都督謚忠

張仁愿華州下邳人有文武才則天時為并州都督長史神龍二年移潞州三年突厥入寇朔方軍總管沙吒忠義為賊所敗詔攝御史大夫代忠義統眾仁愿

至軍而賊衆已退乃躡其後夜掩擊大破之先朔方  
軍北與突厥以河為界河北岸有拂雲神祠突厥將  
入寇必先詣祠祭酌求福因牧馬料兵而後渡河時  
默啜盡衆西擊突騎施婆葛仁愿請乘虛奪取漠南  
地於河北築三受降城首尾相應以絕其南寇之路  
太子少師唐休璟以為兩漢以來皆北守黃河今於  
寇境築城恐勞人費功終為賊虜所有建議以為不  
便仁愿固請不已中宗竟從之仁愿表留年滿鎮兵

以助功時咸陽兵二百餘人逃歸盡擒之一時斬城  
下軍中股粟役者盡力六旬而三城就以拂雲祠為  
中城與東西兩城相去各四百餘里皆據津濟遙相  
應接其北皆大磧也拓地三百餘里於牛頭朝那山  
北置烽堠一千八百所自是突厥不得度山放牧朔  
方無復寇掠減鎮兵數萬人仁愿初建三城不置墜  
門及卻敵戰格或曰邊城不為守備何也仁愿曰兵  
貴攻取不宜退守寇若至此即當併力出戰迴顧望

城猶須斬之何用守備生其退慙之心也其後常元  
楷為總管始築壅門議者益重仁愿而輕元楷焉仁  
愿嘗奏用監察御史張敬忠等數十人皆以文章著  
稱多至大官時稱其知人景龍二年拜左衛大將軍  
同中書門下三品封韓國公春還朝秋復督軍備邊  
中宗賦詩祖餞賞賜不可勝紀尋加鎮軍大將軍睿  
宗初致仕加兵部尚書卒贈太子少傅仁愿為將號  
令嚴將吏信服按邊撫師賞罰必值功罪後人思之

為立祠受降城出師輒享焉

王峻滄州景城人擢明經第則天末累拜鴻臚卿充朔方副大總管安北大都護豐安定遠等城並受節度開元二年以破吐蕃功封清源縣男進并州都督府長史明年突厥默啜為拔曳固所殺其下多降分置河曲峻上書言宜置內地不然者且必有變書未報而虜已叛乃敕峻將并州兵濟河以討之峻間行卷甲捨幕趨山谷夜遇雪恐失期誓於神曰峻事君不

以忠不討有罪天所殛者當自蒙罰士衆無罪心誠  
忠而天監之則止雪反風以獎成功俄而和霽自東  
道追及大破之獲級三千又破趺趺部勺磨等封清  
源公徙封中山郡公進吏部尚書太原尹代張說為  
兵部尚書同中書門下三品充朔方節度大使河北  
河西河東隴右盡屬卒贈尚書左丞相謚忠烈

田歸道雍州長安人仁會子擢明經第累拜左衛郎將  
默啜請和將至單于都護府詔攝司賓卿往勞默啜

請六胡州地及都護府地不得執歸道將害之歸道  
色不撓詈且讓為陳害福會有詔賜默啜絲粟許結  
婚於是更以禮遣歸道既還具陳默啜不臣狀請備  
邊已而果驗神龍中遷右金吾將軍卒追封原國公  
謚曰烈

解琬魏州元城人舉幽素乘邊二十年景雲二年再拜  
朔方軍大總管分遣隨軍要籍官料三城兵省戍十  
萬尋授右武衛大將軍兼檢校晉州刺史賜爵濟南

縣男終同州刺史

顏真卿字清臣開元進士甲科四命為監察御史使河隴時五原有寃獄久不決天且旱真卿辯獄而雨郡人呼御史雨復充河東朔方試覆屯交兵使朔方令鄭延祚母卒二十九年殯僧舍垣地真卿劾奏之兄弟終身不齒天下聳動歷拜太子太師封魯郡公死節謚忠烈

韓游瓌靈武人始為朔方節度郭子儀裨將安祿山使



阿史那從禮將同羅突厥五千騎偽降於朔方出塞  
門誘河曲九蕃府六胡叛部落五十萬子儀使游瓌  
率辛京杲擊破之九蕃府還附以功累拜邠寧節度  
使檢校尚書左僕射與馬燧渾瑊共平河中終右龍  
武統軍謚曰襄

李光進河曲部落稽阿跌之族隸朔方軍姊適舍利葛  
旃殺僕固瑒而事河東節度使辛雲京因依葛旃家  
於太原至德中以破賊功授代州刺史封范陽郡公

郭子儀討大同橫野及河北殘寇用光進為都知兵馬使封武威郡王元和四年討王承宗范希朝表為步都虞候六年充單于大都護振武節度使賜姓李氏卒贈尚書左僕射

李景畧幽州良鄉人大厯末客河中闔門讀書李懷光為朔方節度景畧署巡官五原將張光殺其妻以貨市獄前後不能決景畧覈實論殺之既而有若如厲者敬謝庭中如光妻狀顯名於時回紇將南寇朝議

當得良將舉景畧拜豐州刺史天德軍都防禦使窮  
塞苦寒地瘠鹵邊戶勞瘁景畧至節用約己與士同  
甘苦鑿感應永清二渠溉田數百頃儲廩器械畢具  
威令肅然以禮制虜聲雄北疆回紇畏之卒於屯贈  
工部尚書

任迪簡京兆萬年人舉進士為天德軍使李景畧判官  
性重厚嘗軍宴行酒者誤以醢進迪簡以景畧性嚴  
慮坐主酒者乃勉飲盡之而偽容其過以酒薄白景

畧請換之於是軍中皆感悅貞元二十年景畧卒衆以其長者議請為帥監軍聞之拘迪簡於別室軍衆連呼而至發局取之表聞德宗使察之具以軍情奏除豐州刺史天德軍使時公私缺乏欲饗士無所給至與門下同糲食身居戟戶踰月軍中感其公請安卧內三年上下完充自殿中監授兼御史大夫加常侍入拜太常少卿出鎮易定以疾改太子賓客卒謚曰襄

石雄徐州人敢毅善戰黨項擾河西召隸振武劉沔軍  
破羌有勞會昌初回鶻入寇連年掠雲朔牙五原塞  
下詔雄為天德防禦副使兼朔州刺史佐劉沔屯雲  
州沔召雄謀雄即選沙陀李國昌及契苾拓跋雜虜  
三千騎夜發馬邑旦登振武城望之見屬車十餘乘  
從者朱碧衣謀者曰公主帳也雄潛使喻之穴城夜  
出縱牛馬鼓譟直擣烏介帳可汗單騎走斬萬級獲  
馬牛羊不貲迎公主還進豐州防禦使武寧李彥佐

討劉禎逗留以雄為晉絳行營諸軍副使時王宰屯萬善劉沔屯石會闕顧望莫先進雄受命即勒兵越烏嶺破賊五壁斬獲千計賊大震雄臨財廉賜與輒置軍門自取一匹縑餘悉分士伍繇是衆感發無不奮武宗喜曰今將帥義而勇罕雄比者就拜行營節度使代彥佐徙河中禎危蹙其大將郭誼密獻款衆疑其詐雄大言曰誼為禎謀主今欲殺禎乃誼自謀又何疑雄以七千人徑薄潞受誼降進檢校兵部尚

書徙河陽白敏中猥曰黑山天井功所酬已厭拜神  
武統軍卒

范希朝河中虞鄉人德宗初除振武節度使加檢校禮  
部尚書振武有党項室韋諸郡時為盜希朝於要害  
置柵堡斥候嚴密人遂獲安為盜者必殺無赦戎虜  
甚憚之曰有張光晟苦城久矣今聞是乃更姓名而  
來其見畏如此蕃落凡有進獻無所受積十四年皆  
保塞不為橫城中少樹希朝於他處市柳子命軍人

種之俄遂成林居人賴之貞元末表請入朝時諸鎮  
不以事自述職者希朝而已拜檢校右僕射兼金吾  
大將軍元和初累遷河東節度使敗王承宗於木刀  
溝除左龍武統軍致仕卒贈太子太師謚曰宣武

高霞寓范陽人從平劉闢封感義郡王元和五年以左  
威衛將軍從吐突承瓘擊王承宗加散騎常侍承瓘  
執昭義盧從史其軍驚遣霞寓諭之麾而大呼曰元  
惡縛矣公等宜自安即脫鎧揖而前衆遂定欲留為



帥霞寓間道去明年改豐州刺史三城都團練防禦  
使累遷工部尚書左衛大將軍長慶三年為振武節  
度使吐蕃攻鹽豐二州以兵五千屯拂雲堆寇引去  
浚金河溉鹵地數千頃歷右金吾衛大將軍卒贈太  
保

史獻忠字元貞建康人少為魏牙門將以善戰顯名大  
中初突厥擾河東鈔漕米行賈命為振武軍節度使  
先是鎮帥使游奕兵覘戎有良馬牛彊取之歸值十

一戎人因興盜掠獻忠廉儉少所欲常曰吾居河朔  
去此三千里乃乘五健馬今守邊發吾餘俸不患無  
馬何忍豪市哉故所至莫不懷德累封北海縣子檢  
校尚書左僕射卒贈司空

宋

賀懷浦開封陳留人孝惠后兄也太平興國初以岳州  
刺史領兵屯三交雍熙三年從楊業北征沒於陣

薛超遼州平城人雍熙三年以神衛軍都校從潘美至

西陞敗遼師追至寰州降之超連被創流血濡甲縷部分軍士自若遂下應州仕至天武指揮使卒

孫益宣和末以福州觀察使知朔寧府命救太原時敵勢張甚或言不若北擣雲中彼將士室家在焉所謂攻其所必救也益曰此策固善無違君命因躍馬冒圍至城下張孝純不肯啟門遂死之益天資忠勇傾貲以賞戰士能得人死力云

遼

耶律實迪孟父楚國王之後便弓馬勇於攻戰統和四年為右皮室祥袞時宋將楊繼業陷山西郡縣從樞密使色珍禦之凡戰必以身先矢無虛發繼業敗於朔州之南匿深林中實迪望袍影而射繼業墮馬先是軍令須生擒繼業實迪以故不能為功後屢有戰績卒

金

耶律懷義遼宗室金宗翰取西京天祚謀奔於夏懷義

諫止之不聽乃竊取廐馬歸金命領謀克從軍天會  
初帥府以新降諸部大小遠近不一令懷義易置之  
承制以為西南路招討使乃擇諸部衝要之地建城  
市通商賈諸部兵革之餘人多匱乏自是衣食歲滋  
畜牧蕃息矣從宗翰伐宋降馬邑破雁門屯軍進攻  
太原以所部別降清源縣徐溝鎮遂與諸將別屯汾  
州之境時河東陝西路兵來攻太原劉光世折可求  
柵於文水西山懷義捕得生口盡知宋兵屯守要害

乃分兵襲敗之明年從羅索取汾州及其屬邑遂過平陽出澤潞以趨河陽所至皆降七年還鎮十年改西北路懷義在西陲幾十年撫御有恩及去老幼遮道攀戀數日不得發天眷初為太原尹治有能聲後封蕭王海陵末卒於雲中

完顏芬徹伊克孫領明安皇統間除同知開遠軍節度使斥候嚴整邊境無事大定中再遷開遠軍節度使卒芬徹廉潔忠直臨事能斷凡被任使咸稱

蕭仲宣遼中書令守司空特默子從天祚至實納圖天祚留仲宣侍母遂皆見獲皇統時歷順義昭義軍節度使為政平易小吏不敢為姦賄賂禁絕奴婢入郡人莫識其面朔潞百姓皆為立祠刻石頌之正隆二年卒

完顏永元字惇禮本名約尼代王充子幼聰敏日誦千言言大定中為順義軍節度使朔州西境多盜而猾吏大姓蠹獄訟稽亂賦役永元剔其夙姦百姓安之坐

賣馬與驛人解職又起歷昭義絳陽軍節度使後卒  
永元歷典大藩多知民間利害所至稱治順義政迹  
尤著民為立祠

孟奎字元秀遼陽人大定二十一年進士平章政事完  
顏守貞禮接士大夫在其門者號冷巖十俊奎其一  
也累遷同知西京路轉運使事改僉河東南北路按  
察司事武州刺史上言三事貞祐初卒謚莊肅

富察哲魯字文叔東京路明安人大定二十二年進士



累官順義軍節度使西京人李安兄弟爭財府縣不能決按察司移哲魯平理月餘不問會釋奠孔子廟乃引安兄弟與諸生敘齒列坐會酒陳說古之友悌數事安兄弟感悟謝曰節使父母也誓不復爭相讓而歸朔州多盜哲魯禁絕游食及多蓄兵器因行春撫諭之盜乃衰息獄空賜錫宴錢以褒之貞祐中致仕卒

伊喇富森東北路烏楞古河明安人以蔭補吏歷順義

軍節度副使部內世襲明安穆昆掠民婦女藏之窟  
室人頗聞之無敢發其罪者富森請於節度使願自  
效既跡得其在率衆人索之得婦女四十三人木  
吞抵罪轉同知開遠軍節度事後致仕元光元年卒  
元

趙伯忽世延子為夔州路總管天曆初囊嘉特據蜀死  
於難謚忠愍

明

石享鳳翔人洪武間知朔州勸民力穡訟至立得其情  
兩諭解之民皆感悅後坐事免官朔父老爭赴闕頌  
其治行乞留詔從之

黃里雲內州同知洪武五年秋蒙古兵突入城里率兵  
巷戰力屈死之

朱榮字仲華沂州人永樂十二年冬以左都督充總兵  
官鎮大同修忙牛嶺兔毛河赤山榆楊口來勝諸城  
寇不敢近居三年召還封武進伯佩征虜前將軍印

卒贈侯謚忠靖

張復長葛人永樂間任朔州以才幹稱

呂文延津人成化間知朔州性廉直人不敢干以私體  
恤民隱備至尤善營建自學宮以至鋪舍胥煥然一  
新時稱循吏

莊鑑遼東人襲遼右衛指揮使驍猛有膽決遇賊輒奮  
成化十九年為大同西路參將亦思馬因入邀其歸  
戰牛心山寇遂遁鑑所部無亡失賚銀幣後鎮宣府

以才與大同總兵官張俊易鎮卒

齊壽蠡縣人弘治四年以監生知馬邑縣禁戢兇徒撫  
安善類蓋令之才守兼優者

程端山東冠縣人弘治十一年由舉人知朔州邃性理  
學於算術尤精勤政愛民不求媚上嘗匾其軒曰競  
辰有競辰稿并周天圖說

張俊宣府前衛人嗣世職指揮使累擢大同游擊將軍  
弘治十二年以功晉都指揮同知火篩入左衛擊却

三萬餘騎上大喜立擢都督僉事未幾總兵官王璽  
失事被徵即命俊代之冬以寇入戴罪後晉同知卒  
李端直山東曹州人弘治十七年由舉人知朔州清慎  
公直為當道重一時難決之獄悉以委之皆能辨理  
民以為不冤創修朔州誌

翟鵬字志南撫寧衛人正德三年進士嘉靖二十年俺  
答入山西內地兵部請遣大臣督軍起鵬右僉都御  
史整飭畿輔山西河南軍務兼督餉鵬馳至俺答已

飽去而吉囊軍復寇汾石諸州鵬往來馳驅不能有  
所挫寇退乃召還二十一年三月總督樊繼祖罷除  
鵬兵部右侍郎代之上疏言將吏遇被掠人牧近塞  
宜多方招徠殺降邀功者宜罪寇入官軍遇敵雖無  
功竟賴以安者當錄如賊衆我寡奮身戰雖有傷折  
未至殘生民者罪當原於法俘馘論功損挫論罪乃  
有摧鋒陷陣不暇斬首而在後掩取者反積級受功  
有逡巡觀望幸苟全而力戰當先者反以損軍治罪

非戎律之平皆從其議會降人言寇且大入鵬連乞  
兵餉上怒令革職間住因罷總督官不設鵬受事僅  
百日而去七月俺答復大入縱掠太原潞安兵部請  
復設總督乃起鵬故官令兼督山東河南軍務巡撫  
以下並聽節制鵬受命寇已出塞即馳赴朔州請調  
陝西薊遼客兵八支及宣大三關主兵兼募土著選  
驍銳者十萬統以良將列四營分布塞上每營當一  
面寇入境游兵挑之誘其追諸營夾擊脫不可禦急



趨關南依牆守邀擊其困歸上從之鵬乃濬壕築垣  
修邊牆九百三十餘里增新墩二百九十二護墩堡  
一十四建營舍一千五百間得地萬四千九百餘頃  
募軍千五百人人給五十畝省倉儲無算疏請東至  
平刑西至偏關畫地分守增游兵三支分駐雁門寧  
武偏關寇攻牆戍兵拒游兵出關夾攻此守中有戰  
東大同西老營堡因地設伏伺寇所向又於宣大三  
關間各設勁兵而別選戰士六千分兩營遇警令總

督武臣張鳳隨機策應此戰中有守上從其議且命  
自今遇敵逗遛者都指揮以下即斬總兵官以下先  
取死罪狀奏先是鵬遣千戶火赤力率兵三百不見  
寇復選精銳一百遠至豐州西北遇牧馬者百餘人  
擊斬二十三級奪其馬還未入塞寇大至官軍饑憊  
盡棄所獲奔鵬具實陳狀上以將士敢深入仍行遷  
賞舊例兵皆團操鎮城聞警出戰自邊患熾每夏秋  
間分駐邊堡謂之暗伏鵬請入秋悉令赴塞畫地分

守謂之擺邊九月終還鎮遂著為令二十三年正月  
上以去歲無寇降敕獎之賜襲衣三月晉兵部尚書  
上倚鵬殄寇錫命屢加而責效甚急鵬亦竭智力然  
勢不能呼吸應變九月薊州巡撫朱方請撤諸路防  
秋兵兵部尚書毛伯溫因并撤宣大三關客兵十月  
寇繇順聖川經浮圖峪入鵬在朔州聞警夜半至馬  
邑調兵食復趨渾源遣諸將禦敵御史楊本深兵科  
戴夢桂劾鵬逗遛遂遣官械鵬坐戍卒而以兵部左

侍郎張漢代人皆惜之隆慶初復官

楊博字惟約蒲州人嘉靖八年進士三十五年兵部尚書許論罷起博代之博未終喪疏辭而上以大同右衛圍急改博總督宣大山西軍務博墨線馳出關未至侍郎江東等以大軍進寇引去右衛圍六月守將王德戰亡芻粟且盡士死守無二心博厚加褒卹奏行善後十事事訖當還以給事中張學顏言留博鎮撫奏蠲被寇租因僉其丁壯為義勇分隸諸將博以

邊人不習車戰寇入輒不支請造偏箱車百輛有警則右衛車東左衛車西使相聲援又以大同墻圯繕治為急次則塞銀釵驛馬諸嶺以絕窺紫荊路備居庸南山以絕窺畿甸路修陽方神池諸墻塹以絕入山西路乃於大同牛心山諸處築堡九墩臺九十二接左衛高山站以達鎮城濬大壕二各十八里小壕六十有四五旬訖功賜敕獎賚上數欲召博還又虞邊以問大學士嚴嵩嵩素不喜博請令江東署部事

俟秋防畢徐議之遂不召是歲秋防訖給事中王文炳請召博還上以邊防非博不可命加太子太保留鎮如故時素把伶及叛人了都記等數以輕騎寇邊博先後計擒之又數出奇兵襲寇寇稍徙帳因議築總督翁萬達所創邊牆招還內地民為寇掠者千六百餘人又請通宣大荒田水利薄其租報可旋移薊遼總督後晉吏部尚書少師致仕卒贈太傅謚襄毅吾一奎北直宣化府人左衛副將嘉靖四十年邊寇屬

堡一奎冒矢石親斬十餘級敵解去

王一鳴齊東縣人嘉靖間由舉人知馬邑縣事性溫厚政尚寬和訓生徒以振士風開河渠以固城郭士民賴之

崔世榮為大同參將嘉靖四十五年冬寇犯威遠衛世榮以兵二百禦之與子大朝大賓俱死樊皮嶺獲贈卹

陳董德字懋修歸善人嘉靖四十四年進士萬曆初為

兵科給事中成國公朱希忠卒贈定襄王力爭之忤  
張居正出為饒州知府操江都御史王篆承居正旨  
誣劾之謫馬邑典史復除名後終湖廣僉事

申其學山東人萬厯間以貢知朔州深悉民隱當時稱  
循良第一陞長沙府

李熙大同右衛人沈毅有謀以昌平總兵掛征西大將  
軍印鎮大同先是萬厯間為薊鎮裨將與士卒同甘  
苦傷者撫死者葬軍士感德及鎮大同會當款後訓



練士卒常若有事召入掌後軍都督府

屈煒陝西蒲城人萬曆二十三年由選貢知朔州不虐  
善良不畏疆禦在任八年加銜府同知仍管州事致  
仕

趙奇陝西榆林衛人左衛副將訓練軍士有方後總鎮  
宣大

邵定左衛人任三關遊擊戎騎大舉入寇定領兵截殺  
日暮入草塚山堡被圍數日食盡死之

國朝

王京順德人順治元年任朔州吏目姜逆之亂死其官  
楊達太康人順治三年以拔貢通判朔州風采凜然歲  
饑捐俸煮粥全活甚衆雅好崇獎士類請業者經指  
授胥有法姜逆之亂賊黨姚徇朔州達首倡義諭衆  
而守備張英實通賊達覘知密計擒之錮於獄設守  
禦具翼日登陴道標康姓英黨也按佩刀怒目視達  
達立起奪其刀英子復鼓譟賊黨乘之入城因為所

執賊欲誘之降達大怒目眦盡裂罵賊不絕口賊怒  
磔殺之事聞

贈山西按察司僉事

徐一范江南蕪湖人以進士任禮部郎中轉左衛兵備  
道時業知姜瓖變私念猶子明弼知馬邑縣可藉以  
殺賊驅車直前不少沮北至城下傷於槌蓋賊黨環  
匝一范固無繇察也至死罵不絕口

宋子玉遼東人順治間任大同兵備道駐朔州姜逆之

亂密與通判楊知州王謀靖內患既而變猝起謀不克遂因手刃愛子以死

王家珍遼東人順治五年任朔州知州十二月死姜逆之亂家珍有幹畧涖任不半期竟以節殉識者惜之彭有德遼東人順治間以軍功陞右衛叅將姜逆之亂勢甚熾有德抗志不屈賊圍署捍禦不支單騎潰圍投親王帳家人六十餘口胥遇害後仕至大同總兵

費揚武正白旗滿洲人以内大臣撫遠大將軍兼攝右衛建威將軍康熙三十五年統滿漢兵出殺虎口與大同總兵康調元殺虎口協鎮王元登天山過瀚海直抵招磨多地方征厄魯特嘎爾噶爾丹飲藥死擒其妻子以歸凱旋論功封為一等公餘陞賞有差

徐宗仁陝西長安人先以把總出西寧先登又勦西海爾各隆寺有功雍正六年擢殺虎口副將涖任後復赴陝從征駐峩崙磯轉戰卜羅縛井紅山峽殺賊甚

衆賊悉以衆至宗仁據山待之自辰至未戰益力以  
火器傷殞授世襲拜他拉布勒哈番祀忠勇祠

寧武府

唐

李大恩宗室子封定襄郡王武德四年守雁門突厥頡  
利與馬邑苑君璋帥衆來攻大恩擊走之頡利懼乃  
放還前拘使臣孫順德蘇瓌鄭元璫請和五年春大  
恩奏突厥饑荒馬邑可圖詔與殿內少監獨孤晟帥

師討之期以二月會馬邑晟後期不至大恩頓兵新城突厥遣數萬騎與劉黑闥合軍圍之大恩戰歿於陣

宋

趙滋字子深開封人韓琦言真將帥才薦授并代路鈐轄改管勾河東經畧司公事建言代州寧化軍有地萬頃皆肥美可募人田作教戰射為堡砦人以為利終天武捧日四廂都指揮使滋馭軍嚴簿書米鹽皆

有條法而性尤廉謹月得公使酒不以入家云

郭達字仲通邢州人慶歷中通事舍人坐使遼黜為汾州都監時龐籍鎮河東俾權忻州遼來求天池廟地籍不能決以諉達達訪得太平興國中故牘證為王土檄報之遼人愧伏治平二年同簽書樞密院出判永興坐案王韶落宣徽使知潞州徙太原復宣徽使再貶致仕哲宗起知潞州進廣州觀察治知河中辭歸洛卒



崔鷗字德符陽翟人第進士徽宗初極論司馬光忠章  
惇姦蔡京籍為邪黨移病屏處十餘年宣和六年起  
通判寧化軍召入道中草疏曰數十年來王公卿相  
皆自蔡京出要使一門生死則一門生用一故吏逐  
則一故吏來更持政柄無一人立異無一人害己者  
此京之本謀也海寓胥壯之晉龍圖閣直學士卒

張汝明字舜文廬陵人第進士徽宗時以司門員外郎  
通判寧化軍地界遼文移數往來汝明名觸其諱遼

以檄暴於朝安撫使問故衆欲委罪於吏汝明日詭辭欺君吾不為也責監壽州麻步場晚知岳州卒

金

完顏玖珠宗室子為武州刺史唐古博克遜為軍事判官貞祐二年十一月元兵取玖珠子姪抵城下謂之曰山東河南今皆降我汝之家屬我亦得已不速降且殺之玖珠曰當以死報國遑恤家為無何城破力戰而死博克遜亦不屈死焉贈玖珠臨海軍節度使

加驃騎衛上將軍博克遜建州刺史加鎮國上將軍  
仍令樹碑歲時致祭

元

魏賽音布哈息州人至正間以河南省右丞統兵守偏  
頭關克武州不戮一人民為立碑思之

明

汪興祖巢縣人洪武元年以都督兼右率府使西取大  
同將三衛卒守之再敗敵兵斬獲無算進克武朔二

州獲知院馬廣等命為晉王武傳兼山西行都督府  
僉事三年冬封東勝侯四年伐蜀中飛石死

馮徵綏德衛人弘治末署指揮僉事守備偏頭關正德  
七年勦流賊力戰洛南死贈洛南伯明年是日徵死  
所風霾大作又明年亦如之建祠

陳經正德間以太原左衛指揮任寧武守備少有大節  
善騎射博涉經史工書畫事繼母以孝聞涖官值邊  
警率所部奮勇力戰歿於陣事聞贈昭勇將軍立祠

春秋祀之

李涑容城人廕保定後衛指揮僉事累晉山西總兵官  
寇四入驢皮砦諸處涑及游擊史畧禦却之寇再闚  
三關涑拒險不得入俄突神池利民堡迎戰於野猪  
溝驅之出境晉署都督同知以援河曲老營堡稍後  
停俸嘉靖三十二年寇犯大同壁永安堡寇得利去  
尋復自大同入山西巡撫趙時春帥師至廣武聞有  
零騎欲親擊之涑力諫不從追及於大蟲嶺伏兵四

起涑太息謂時春曰公急去吾死此時春奔寇欲追之涑殊死遮擊與子松及遊擊李柱參將馮恩守備孔賓高遷指揮陳金尹忠俞輝皆戰死一軍盡歿贈涑少保左都督謚忠愍廕子世指揮使立祠予祭葬松亦贈指揮同知恩以下贈卹有差

丁璋為山西副總兵嘉靖二十年寇犯寧武關石湖嶺大戰死之贈卹如制

李如松字子茂鐵嶺衛人寧遠伯成梁長子也驍果善

戰少從父諳兵機萬曆十一年為山西總兵官給事中黃道瞻等數言如松父子不當並居重鎮大學士申時行請保全之召僉書右府十五年鎮宣府復與山西李迎恩更鎮其後軍政拾遺給事中閱視數遭論劾上終眷之不為動後平寧夏朝鮮二十六年搗土蠻巢力戰死謚忠烈

李修吉字允敬同州人萬曆丙戌進士初授萊州司理讞獄多所平反遷戶部主事出理寧武糧儲度支明

允宿弊一清又條議時宜急需四事皆經國要務疏  
上深見嘉納未幾被誣劾掛冠去修吉性醇謹不務  
紛華尤篤志純儒業著理學邇言二卷

陳昌祚福建長樂人前督學道瑞子萬歷間以進士任  
偏關兵備道輯安兵民尤嘉惠學校嘗過三功祠下  
眷懷先澤移建南城外順城街中復紀其顛末勒之  
貞珉祀名宦

魯欽長清人萬歷末為山西副總兵天啓中為貴州總



理勇敢善戰名冠西南諸將六年禦安邦彥殉節贈少保左都督建祠曰旌忠

楊仲業為山西總兵官天啓中改援遼總兵官父子並戰死贈都督同知世廕千戶從愍忠祠附祀

李輔明遼東人崇禎十二年為山西總兵官被劾罷十六年冬戰歿於寧遠贈左都督列壇前屯祀之

王允懋字有懷霸州人第進士崇禎時知太原府遷寧武兵備副使李自成既陷太原遣使說降斬之與總

兵周遇吉固守城陷自刎死妻楊投井殉

國朝

金光祥遼東人順治五年任寧武兵備僉事道性嚴厲  
姜逆之亂寧武兵從之光祥自縊死

贈光祿寺少卿蔭子入監祀忠烈祠

李吉順治間任寧武副將姜逆之亂部下徧從賊執吉  
說降吉力斥之投繯死

張國纓京衛人順治年以武進士任偏關叅將姜逆之

亂時業告疾得請矣聞變不以去位為解出戰為賊  
殺

邱登戎順治間任寧武營把總死姜逆之亂

詔恤其家祀忠烈祠

山西通志卷九十五